

ASO LUA, 21 SETEMA 2021

Na nofoia e le Fofoga Fetalai le Nofoa i le itula e 9:30 i le taeao.

Tatalo.

FOFOGA FETALAI: Ou te faasilasila atu ua toe amatalia nei Taulumaga o le Fono Aoao Faitulafono.

Ia, e avea lenei avanoa e ofo alofa ma faafeiloai atu ai i le paia o le Palemene i lenei taeao fou. Ua sola le pogisa ma puapuaga, a o le faafetai i le Atua ua mafai ona tatou fesilafai i Lona alofa ma Lona toafilemu. Ua maualuga lo outou soifua manuia ma le lagi e mama, o le molimau ola lea o le finagalo alofa o le Atua ma Lana faaauau pea o le tatou valaauina o Taitai o Samoa i lenei vaiata o le tatou savaliga.

I le afio o lau Afioga i le Palemia, afio o lau afioga i le Sui Palemia, afifio le paia i Minisita o le Kapeneta faapea foi a outou Afioga i Minisita Lagolago.

I le paia o lea Itu o le Maota i le afio o lau Afioga i le Taitai o le Itu Agai, lau Afioga i le Sui Taitai, faapea foi le mamalu o sui usufono uma o le Palemene. Malo le soifua manuia malo le lagi e mama, faafetai i lo outou onosai mo le faaauauina o le tatou galuega.

Le tapuaiga a Samoa, vaeatu le Afioga i Le Ao Mamalu o le Malo ma le Masiofo, le Afioga i le Sui o le Fono a Sui Tofia, lau Afioga i le Faamasino Sili ma le mamalu o le Faamasinoga, afifio Aiga ma Tama, Tama foi ma Aiga, le usoga a Tumua ma Pule, Ituau ma Alataua, Aiga i le Tai ma le Vaa o Fonoti.

Le paia i Faauluuluga o Ekalesia Kerisiano i Samoa ma le aufaigaluega tofofi o le Talalelei. E faatalofa atu lau Palemene i lenei taeao fou, malo le soifua manuia, malo le lagi e mama. Ia tapuai maia ma le manuia.

A o le i alo atu mo saunoaga o lenei taeao, ua na o se tautaulumau a le Nofoa i le paia o le Palemene, ia alofagia, e le faatagaina e le Fofoga Fetalai ona toe afea e se saunoaga mataupu ua uma ona faia i ai faaiuga a le Nofoa. E mamalu le tatou Fonotaga o tatou lava, tulou le gagana. Ou te iloa lava lo outou naunau i saunoaga ma tuleiga. A ia alofoga ia tatou tautuala ua taoto a tatou Tulafono Tumau, o Tulafono e puipui ai le faaaliga o taofi ma Tulafono e puipui ai le nofo filemu o le tatou Maota.

Mo le silafia e lenei Maota, ua lagona e le Fofoga Fetalai le le talafeagai o se tasi o saunoaga ananafi ua tuuaia ai e le sui usufono mo Faleata Nu.3 le Fofoga Fetalai e faapea ua tuli le Failautusi o le Fono Aoaio Faitulafono. O le saunoaga a Faleata Nu.3 e foliga e malu afefoe ae faapaimata ma ua solia ai le tatou Tulafono Tumau 83 (2). O se mataupu e leai sona fesootaiga ma le mataupu o lo o talanoaina e le Maota, ma ua atagia ai le le amanaia o le Nofoa ma ona tulaga aloaia o lo o tausi ai le Nofoa.

E tau ina ou faapuupuū atu, e le o se faaiuga na fai faataetaealuga lona faataunuuina, o se mataupu foi e le tatau ona ou talatalaina i totonu o le Maota, ma e le tatau foi ona saunoa i ai se sui usufono i totonu o le Maota, e ono taitaiseseina ai le faafofoga a le Maota ma le atunuu.

E tusa ai ma Tulafono Tumau 91, ua ou faatonuina le Failautusi ina ia tuueseina upu ia mai faamaumauga aloaia o le Palemene, ma ua ou fautuaina le paia o le Palemene, e le toe faatagaina ona toe afea i se saunoaga lenei mataupu. Alolofa le paia o le Maota, tatou tausisi i a tatou Tulafono Tumau. E le atoatoa foi le Nofoa tulou, ua na o le Atua e i ai le atoatoa, e faamoemoe atu foi le Nofoa i la outou lagolagosua. Mo le sologa lelei o le tatou galuega, ou te toe tatalo atu ia agai sao saunoaga i mataupu e maua ai lo tatou nonofo lelei ma le filemu, a o se ai mo le tapuaiga a Samoa a ia faasilisili mo se viiga o le tatou Tapaau Sili.

O le mea lea, na ona ou toe faamanatu atu, tatou galulue faatasi. E le milia faauu upu o le Maota lenei, a ua taoto a tatou Tulafono Tumau. O le taiala lena e faatonutonu ai a tatou felafolafoaiga ma tausisa ai le filemu o le Maota.

O se fautuaga lea a le Nofoa, ae ia manuia tele le alo atu o le paia o le Palemene mo le fonotaga i le aso, aemaise o sui usufono o le a sausaunoa e tusa o felafolafoaiga o le Tala o le Tupe.

Tofa Lealailepule Rimoni Aiafi (Faleata 3): Lau Afioga i le Fofoga Fetalai...

FOFOGA FETALAI: Ou te le faatagaina se saunoaga i le taimi lenei, o lea ua uma ona fai atu le... ma ou te le toe faatagaina se isi avanoa.

Tofa Lealailepule Rimoni Aiafi: Ia, e ava atu i lau Afioga, ae leaga o lea ua taua aua e i ai mafuaaga lau Afioga. E pei lava ona malie i lau saunoaga i lea aso, tatou faagalo ma agai i luma pei foi o ananafi.

FOFOGA FETALAI: Alaala mai i lalo, o lea ua ou faatonua e alaala mai i lalo. Alaala mai i lalo.

Tofa Lealailepule Rimoni Aiafi: Ia, ae e le afaina, afai ua aveese upu, ia faafetai.

FOFOGA FETALAI: Alaala mai i lalo le sui usufono.

**TULAFONO TAU FAAOFI O LE FAATATAUINA O TUPE
2021/2022 – felafolafoaiga faaauau i luga o le faitauga faalua
– Aso 5**

FOFOGA FETALAI: E tolopo galuega a le Fono Aoao i le aso fono ananafi ua maea ona saunoa le sui usufono mo Vaimauga Nu.1.

A o le avanoa leni, tulai mai se sui usufono e sausaunoa. Ia ua matau atu o lea ua tulai mai se tasi o sui usufono matua o le Maota, le sui usufono mamalu mai le itumalo o Siumu, Hon Tuuu Anasii Leota, ia lou avanoa leni.

Tofa Hon TUUU ANASII LEOTA (Siumu): Faafetai i lau Afioga i le Fofoga Fetalai. Ae ou te fia piiama foi i le faasagi ma le faapolo na e siitia i leni taeao fou ma leni aso fou, e viia ai pea le agalelei ma le agaalofoa o le Atua, ua alafai mai i faguga lelei lau Afioga i le Fofoga Fetalai, faapea foi lau Afioga i le Palemia, Minisita o le Kapeneta, aemaise o le mamalu o sui usufono o le Palemene o le Malo o Samoa. Malo le soifua, malo foi le lagi e mama.

Lau Afioga i le Fofoga Fetalai, ou te tulai atu lava i le ava ma le faaaloalo atoa ai ma le migao i le agaga o le faafetai ona o lou avanoa. Aua e faalupe lau Afioga o le ki ma le tatala o le Maota leni. O oe foi o le faauluuluga o leni foi Tafatolu o Pulega Malo.

Ae le tau faamatieina le paia o le tupua ma le eleele. O le paia o Tiafau o tua o Malie ma Vaitoelau, ae matua le tuu ia Tuisamau. O le malae e fatufatu ai titi ma lipoi ai upu o faigamalo. O le malae o le faautugatagi a Samoa. O le malae foi na saili ai i le Atua se filemu ma le saolotoga o Samoa, e afio ai lau Afioga i le Fofoga o le Maota. Afio lau Afioga i le Palemia ma lau Kapeneta, afio foi Minisita Lagolago.

Liliu mai foi i lea itu o le vai i le afio o lau Afioga i le Taitai, le Sui Taitai ma sui usufono mamalu o le Vaega e Puipuia Aia Tatau a Tagata. O sui usufono mamalu ia o le Palemene o Samoa.

Ou te faatalofa atu foi i le paia maualuga o Samoa i ou sa e le avea ua popo ma ou muafatutoto ma ou papa tuloto. E leai lava se vave e mafai ona toe autalaina ou fue lavelave, aua ua uma ona tuumatamaga.

I le tapuaiga a Lana Afioga i le Ao Mamalu o le Malo ma le Masiofo, le Sui o le Fono a Sui Tofia ma le faletua. Le Faamasino Sili ma le mamalu i alii ma tamaitai o le Faamasinoga. E faapena foi i le Failautusi ma le mamalu o le Ofisa o le Fono.

Ae seu silasila foi aua le tapuaiga a Samoa i ona tulaga faalupe. A o le mavaega i le taisamasama, e taoama paia ma mamalu o aiga, ae laga i matau

le faatofalaiga aua tamasa o le talalelei o lo o latou taitaiga ao lavelave o le faanuupo, ae apoapo ao sinasina ina ia fao le vaa o mala ae fuli le vaa o manu.

O le paia lava lea i Aiga ma Tama, o Tama foi ma Aiga, a o se faautautaga foi i le aufueta ma le aufueloloa o Samoa, le usoga a Tumua ma Pule, Ituau ma Alataua, Aiga i le Tai ma le Vaa o Fonoti. O Lalogafuafua, o Malie ma Vaitoelau, o Maauga ma Nuuausala, faapea le tapuaiga aua Faleu ma Utuagiagi. Ae a utu le sami ma ou sopo le vasa ma laasia laufanua o Puleono i Salafai, e amata mai i Fuifatu, Vaituutuu, Finao, Matia ma Matia Ituau, Faletoi ma Vailoa. O paia na o Samoa. Ae a le tapuaiga a Ofisa Sili o Pulega ma le mamalu o tagata faigaluega uma a le Malo, Matagaluega ma Faalapotopotoga Tumaoti, Kamupani ma le maave eseese o le Afaipisinisi o lo o tauaveina le atunuu i le ao ma le po.

Ae sisi foi le faamalama aua e le faagaloina le tapuaiga a Tutuila ma Manua, i le afio o le Kovana Sili, le Peresetene o le Maota maualuga, le Fofoga Fetalai ma le Maota o Sui. O le paia lava lea i le afifio o Faasuaga ma le fetalaiga i le Tama Matua ma upu i le Faleagafulu. Le afifio o alii Faatui ma le afio o alii, le Laau na Amotasi, alaalatai Tootoo o le Faleula ma upu ia te oe le Manuatele.

Lau Afioga i le Fofoga Fetalai fai mai upu a le atunuu, e ui ina pipii tia ae mamao ala. E tu lilia foi ae maniti tino i le pisaga. Peitai o le aso ua matalupe le seuga, ua silasaaga le lupe o le taeao. E ui ina mamao le ala, soua ma lualuta le gataifale a o tatou malaga mai i le amataga o lenei tausaga. Ae faafetai i le Atua o lea ua sisi le laafa ae tiu i le lafala lo tatou sa. Tatou tulimatai pea lo tatou agai atu i le lumanai, aua se manuia o Samoa ma ona tagata. Ia tatou faafoi la le viiga ma le faafetai i le Atua, o le Atua soifua, o le Atua o lo o faavae i ai Samoa, o le Atua o Malo ma atunuu uma o le lalolagi. O a mea na tutupu ananafi, tatou faagalo ma lafoai. Tatou tepa taulai i le lumanai, tatou galulue faatasi punouai, aua se manuia o Samoa ma lona lumanai.

Lau Afioga i le Fofoga Fetalai, ona ou oo mai lea i sina tala puupuu lava i le faamatalaga i le Tala Faatatau o Tupe 2021/2022. Ia e momoli le faamalo ma le faafetai i le Afioga i le Minisita o Tupe, malo le galulue, e le faigofie foi i lenei tulaga le galuega ua faafeagai ma lau Afioga. Malo! E matauina ua faapauina i le 20 ua faaitiitia ai totogi o le tele o auaunaga a le Malo. Ae ou te talitonu lava o lea ua ogatasi ma le anavatau aua le manuia lautele o le atunuu. Afai lava ua tagatagai atu lau Afioga ua talafeagai, ua faapena foi ona lava vaega eseese e ono maua mai ai seleni mo le faagalueina o le tatou Malo, ia sagai ane ai o le tai ina ia faapena ona manuia le faamoemoe o le tatou atunuu.

Lau Afioga i le Fofoga Fetalai, e manumanu i le tatou taimi, aemaise foi o lea e maua isi avanoa pe a auiliili le tatou Tala o le Tupe. O lea o le a ou talanoa sao ai i manaoga o lou itumalo aemaise foi o galuega sa ou tautinoina

i lou itumalo, afai e manuia lou tulai mai ma lou faamoemoe, ia o le a ou taumafai lava e finau i le Palemene. Ou te talitonu foi e faigata i le Minisita o Galuega le faatinoina o le tele o nei galuega ua lau atu i lana Afioga. Ae o si tamai mea lava lea lau Afioga, na ona ou pai lava i ai ou see ese loa o le a le tele i ai sau faamatalaga ona o lo o faapena ona tapisa ai foi lou itumalo, ina ne i pea mai ua ou le faaleoina. O le tai \$1 miliona a le itumalo, ua uma, ma le penisione a le aumatutua. O lea faafofoga mai lou itumalo, o lea ua manino le saunoaga ma ua tali a le Malo i tulaga uma, ae faafetai i lau Afioga. O lea ua faaauau la le faamatalaga, ia, o la e ua faafofoga mai le itumalo ina ne i alu alu faapea mai ua ou le faaleoina, pe alu alu faapea mai i le sauniga o se isi faiga palota, se na tala lava e le tatou sui usufono ma le toe aliali mai. Ia ae faafetai mo le avanoa.

Ia, ona ou oo mai lea i le Minisita o Galuega, masalo ou te taua le Afioga i le Minisita o le toa manumanu o le Palemene lenei. Faamalo faafetai mo lou valaauina. Ia o mea lava ia sa faapena ona ou talanoa ai i lou itumalo, a ou oo mai o le a ou taumafai lava e faatino tatou auala galue. Faafetai foi o la ua lelei le auala galue i lou nuu i Matafala, faapea foi le auala galue i Maninoa, ua i ai foi le vai ma le eletise. Faafetai.

Ae ou te talosaga atu lava i lau Afioga i le auala galue i si ou nuu lea o Saaga. O le nuu lea e tuaoi ma Falealili, ua leva ona talosaga mai ae le i maua lava se avanoa, ae ua ou tuuina atu i lau Afioga se talosaga mo se auala galue i le pitonuu lea o matou.

E fia faataina foi le auala e agai i tai i le aai i Siumu. Ua tele lava ina faaleagaina le auala, e moomia lava le toe alu ai o le ta. Ma le faaaloalo lava i lau Afioga. E i ai foi le alavai e 200 mita pe a mai le matou faleaoga i le agai i Falealili, a timuga ona tatafe lea ma le mafai ai ona feoai aemaise lava le agai i le atu Falealili ma le atu Aleipata, e moomia ai se auala sima lau Afioga. Ia, e anoanoai lava isi talosaga, ae talitonu ua lava lea mo lenei taimi, ona o lo o faapena ona tele foi talosaga a le mamalu o le Palemene nei.

O le a ou see mai i lau Afioga i le Minisita o le Soifua Maloloina. Se i faamolemole ua matou lelavava lava ona malaga i Falealili i le tuneva o le po ma le mutinitini o le la. Afai ua i ai se polokalame ma se fuafuaga a le Malo ina ia toe fausia ma faatulaga lelei falemai faaitumalo o le atunuu atoa, faafetai. A o le talosaga vaivai faamolemole ia faavavevave ona faatino lea vaega. Ma lou faaaloalo.

E momoli atu foi le faamalo ma le faafetai a lenei itumalo i lau Afioga ma le Matagaluega i fuafuaga uma aua le puipuiga malu o si o tatou atunuu mai nei faamai, le faamai oti lenei o le Koviti-19. E tuuina atu ai pea ma faaopoopo atu i nisi o fautuaga ua tuuina atu ia alofagia ia malupuipua pea o tatou tuaoi, ona e fai lava si popole i le tulaga ua i ai, ua latalata mai, ona o le isi foi ituaiga faamai fou e saosaoa ma vave lona pepesi. Faamalo lava i lau Afioga. Faafetai.

Ona ou see mai lea i le Minisita mo Aoga, Taaloga ma Aganuu, tasi lea mea sa matauina le tele o matua a o faagasolo foi le tatou faiga palota sa faatalosagaina se fesoasoani tau seleni e faatupe ai aoaoga a le fanau aemaise le Iunivesite, le NUS. E talitonu ma anoanoai alo ma fanau e atamamai, ae paga lea ua faamutaina ona o le lima vaivai. Ia se i silasila ane lava lau Afioga po o i ai se tatou polokalame po o se tulaga e faapena pei o mea ia e fai e atunuu mamao e i ai Niu Sila, student loans e fesoasoani ai i le fanau i le taimi e moomia ai ina ia mafai ai ona faaaau ai aoaoga, ae totogi a latou aitalafu. Faamalo faafetai i lau Afioga i le Minisita. Ia manuia tele le galuega.

Masalo na pau ia o mataupu lau Afioga i le Fofoga Fetalai, ae o le a ou faaaogaina lou avanoa lenei se i fai ai sina faamatalaga i le itumalo. Aua e le faagaloina le vai na ou inu ai ma ou faalanu ai, aua le tapuaiga a lou itumalo o Siumu. E i ai lou talitonuga sa outou faanonomanu ma faatagisia le Atua malo se i liligi mai ma toto mai le ua faalanumaaveave ia ui magalo ai le ava, ae tofufuola le vai nai le fale Tuamasaga aua lenei valaauina, ia fai se sao ia Manuvao ma togi sau maa aua upufai o Malo mo se manuia o lo ta itumalo e pele i le agaga.

O paia o le ta itumalo e amata mai Siufaga ma Saumolia, seia paia Faletele. O le paia lava lea aua le afifio o Sa Asomua ma Aiga e Lua, le faautautaga mamalu i lau fetalaiga Tuuu ma le Aiga Sa Tuuu. Le Falelua o Tulafale, le Fofoga o le Alataua, Utaileuo ma le mamalu i le Faletolu.

Ae a le tapuaiga a nofo a faafeagaiga ma Ekalesia i so o se fatafaitaulaga o lo o faafalelemalu aua le Atua ma Lona finagalo i totonu o le tatou itumalo. Aemaise foi o le tapuaiga a faletua ma tausi, saao ma le aualuma ma le malosi o le tatou nuu. Faamalo le tapuai, faafetai mo talosaga. Faamalo foi le onosai i lo outou paia ma lo outou mamalu, o lea ua apoiliu le atu sa faatautuli. O le taeao lenei o le taeao o le folofolo, o le taeao o le moomoo, o le aso foi lenei na taualei ai le vaa o le tautai i le pale. Ae ua a nei? O lea ua ou sisi, faafetai i la outou faaeaea ma la outou faapale, o la outou pule lea.

Lau Afioga i le Fofoga Fetalai, o le a seu i fanua le vaa o le tamaloa na itufa i ai Atua. Afai ua soliuaga ma sopolagi gagana, ia natia i fatualavai ma faatea i nuu le aina. Ia faamanuia tele le Atua i lau Afioga i le Fofoga Fetalai.

Ia manuia tele le tapuaiga a Samoa o faafogafoga mai. Faamanuia le Atua i le tapuaiga a si ou itumalo o Siumu. Ae ou ola i le alofa ma le agalelei o le Atua. Soifua ma ia manuia le Fono.

Na faaalua le agaga fiafia o le Maota i le patipati o latou aao i le maea ai o le Saunoaga a le sui usufono mo Siumu.

FOFOGA FETALAI: Ua faamalo faafetai tanoa, faafetai foi mo le saunoaga i lau afioga i le sui usufono mamalu mai Siumu. O oe lava o le

tama matua o le tatou Maota. E moni foi i nai taimi sa le auai i le Maota, e omai lava tama matutua e faamatutua ona fai le tofa. O le mea lea faafetai tele malo saunoa faafetai tanoa. O lea ua agai tonu lava aua manaoga o si ou itumalo aua foi le faafogafoga mai a le Palemia ma le Kapeneta, aua le faalaulelei ma faalelei mea uma o le itumalo. Malo le lauga faatoeaina, malo foi lauga faatama matua o le Maota. E lagona lava matai e lelei i saunoaga. Faamalo faafetai mo le galuega ma le lauga i lo tatou Maota.

Ou te iloa o le avanoa lelei lenei mo se tasi o sui mamalu. E matau atu o lea ua tau fuafua mai le sa o le sui mamalu mo Vaimauga Nu 3, o Hon Tapunuu Niko Lee Hang. O se tasi foi o tama, o toelutaia o le Maota. Ia o le avanoa lenei e saunoa ai lau Afioga.

Afioga Hon TAPUNUU NIKO LEE HANG (Vaimauga 3): E muamua momoli lau faafetai i lau Afioga i le Fofoga Fetalai mo lou avanoa.

Ae le i faia sau faamatalaga i le Tala Autu o le Tupe. E fia piiama foi lou nei sui usufono mai le Vaimauga 3 i le talosaga siitia na e tapenaina ma e saunia i lenei taeao. Ia saga viia ai pea le alofa a lo tatou Tapaau o i lagi, aemaise foi o Lona filemu ma Lana puipuiga o le mamalu o lenei Palemene, i sui usufono uma o le tatou Palemene, ina ia maua pea e i tatou uma le loto maualalo le loto filemu, le loto onosai ae aua le vevesi.

O le tala masani lava e vevesi lava ma faapena uso ma tuafafine, ae tua lava i le manuia ma le agalelei o le Atua. O lea la e faafetai i lau Afioga ona o le talosaga na siitia nei i le taeao, ina ia ulufia e i tatou uma le Agaga Paia o le Atua i lenei taeao. A maua e tatou uma le loto lenei, alofa, e pei lava o le Tulafono taua lenei a le Atua. Ia e alofa atu i le Atua. Ona sosoo mai ai lea o le isi Tulafono taua, ia e alofa atu i le lou uso a tagata.

O le upu tomua lea ina ia fesoasoani mai foi le Atua i lou tapenaga, ina ia malu i lo outou faafogafoga mai, aemaise ia maua ai se viiga i lo tatou Tama o i le lagi. Faafetai i lau Afioga mo le avanoa.

Ia mapu maia, i logoe le taputoa o alii seu, aua ua malu tiasa, o paia faaifogata o Samoa o le atunuu tofi. Ua taoto i fata ae ae i lumafale. E afua mai i le fatifatialuga ma le fatifatialalo i le tai samasama na alofisa ai le Malietoa ma le Tuimania i le Matasaua seia paia le tai ulaula o Nafuaefili ma Puletuu. Na to ai manu o Malo, o le a le toe ta i maau pe ta faalama, i se tuumumusu, ina nei sii ma tuu, ona fai ai lea ma lape o lauga ma tautalaga ai se tautalaga.

Lau Afioga i le Fofoga Fetalai, o se viiga ma le faafetai i le Atua, e le mafai ona vaea le falaooto pe tatou te tausoina faameataitai a tamaiti leaga.

Ae o le taeao lenei ua ou manatuaina ai le tala na afua ai ona maua le igoa o le matou nuu.

Fai mai le tala, a fia inu le tamaitai o Sina o le alo o Faasavalu, na fia faitane atu i le fee, o le aitu o le Vaimauga. Ona fai lea o le laina tagata i le Loimata

o Apaula, ona asu tuutuulima lea o le vai, se i tali ai le galala o Sina. E afua ai ona maua le igoa o Vainatuutuulima po o Vailima.

Se ua faapena le aso. A lele ua Vainatuutuulima le alofa ma le agalelei o le Atua, i lo outou soifua manuia, a o lou foi ola. O lea ua potomoli i fatuafu e tasi, malo afua taeao ua maua Samoa, i lau faafogafoga tapuai i lenei aso. O lea ua tulima tutula la outou paia ma mamalu i le Maota nei o le Palemene o Samoa.

O le Maota i Tiafau, o le faautugatagi a le Atunuu. O tua o Sinave ma Ulumootua. I le afifio o Aiga ma Tama, o Tama foi ma Aiga, Pule ma Tumua, Ituau ma Alataua, Aiga i le Tai ma le Vaa o Fonoti.

Lau Afioga i Le Ao mamalu o le Malo, lau Afioga Tuiaana Tuimalealiifano Vaaletoa ma lau masiofo. Sui o le Fono o Sui Tofia ma lou faletua.

E le faagaloina le tapuaiga a lou itumalo pele o le Vaimauga 3. I le mamalu o le faleupolu i lena itu o le vai. Le afio o le matua o Tafoeono, afifio Asi ma Patu, afifio aiga e tolu, maliu mai i laua na tai, susu mai Tuiotaga ma le usoalii. Alala i laua o le launiunasaelua ma le moafagatau. Alalatai le nofoaituaiga ia Fuata. Tainane le itumalosi, le paia o le faletolu o Sagauga, aua le afifio o tama o Alosina, afifio laua matua, afifio usoalii, afifio le Aiga Salevalasi, susu alo o le Malietoa, alalatai le faletolu ma le Vaigalelepa.

E le galo afia i si ona vao, i le nofo tatalo a si ou nuu o Vailima po o Vainatuutuulima. Afio lau afioga i le Tapunuu, lau afioga Sooalo. Afifio aiga alalatai le matua fetalai ia Feetau, lo la toalua ia Puaalatamai ma Puaasegisegi. Le lautinalaulelei ma le nofoaituaiga i tulafono.

Le nofo a faafegaiga a lo tatou itumalo o Vaimauga Nu 3, i Fatafaitaulaga e fia, faamalo le tapuai, faamalo le tatalo.

Ona oo mai lea i le paia o le Maota o lo o sasao nei. Afio lau Afioga i le Fofoga Fetalai o le Maota. Afio lau Afioga i le Palemia, afifio Minisita o le Kapeneta, faapea a outou Afioga i Minisita Lagolago.

Afio lau Afioga i le Taitai o lenei Vaega HRPP, o le Itu e agaia le Malo. Afifio sui usufono uma o le Maota o Samoa. Afifio Ofisa sili o Pulega o Matagaluega eseese ma le augalulue a le Malo.

Afio lau Afioga i le Faamasino sili, afio lau Afioga i le Peresetene o le Faamasinoga o Fanua ma Suafa faapea le Ofisa o Faamasinoga.

E pipiitia ae mamao ala, talofa talofa faatulou atu. Lau Afioga i le Fofoga Fetalai, e muamua lava ona faamauina le agaga faafetai i lau Afioga i le Minisita o tupe mo le Tala Faatatau o le tupe 2021/2022, ua i lumamea nei, aemaise ai le Pulega o le Matagaluega o tupe. Faamalo le tapena.

E manaia tele le mission po o le manulauti o le Faavae autu o le Tala Autu o le tala o le tupe 2021/2022. Ua ave le faataua i lou aiga, ou tagatanuu. O lou Atunuu ma lau Aganuu, Tu ma Aga e faakerisiano. O le tatou matafaioi tauave faatasi lea, viia ai le Atua.

Lau Afioga i le Fofoga Fetalai, o lau fesili, ia faamalulu atu ne i te i ua tetena se finagalo. A o lau fesili tuusao lava i le Afioga i le Minisita o tupe

ona o le saunoaga lea i le mission. Ou te le toe fia tautala i le mea na tutupu i le aso 15 o Setema. Ou te talitonu o le aso pogisa lea o Samoa i le Tala faasolopito o le Palemene o Samoa. Sa vaaia ma molimauina mea na tutupu i lea aso ma le loto momoia ma le faanoanoa tele. E foliga o le loimata maligi.

O lau fesili lau Afioga i le Fofoga Fetalai, o atagia ai le manulauti i mea ia na tutupu i le aso pogisa lea, lea na tutupu i le vaiaso lea ua tea?

FOFOGA FETALAI: Ou te fautuaina le sui mamalu, ua tea atu ia atuvasa ua uma foi ona fai le faaiuga a le Nofoa, ia outou alolofa i le tatou galuega. Ia outou alolofa foi i le faafogafogaaga a le Atunuu aemaise o le filemu o le Maota. Ua ou manatu ai ma avatu se faaiuga i le taimi ua sola. Malilie ua tea ia atuvasa ua uma, o le a sili foi lena aso 15, i le aso na tatou fiafia faatasi ai ma faafealofani ai tatou uma. O le ala lena. O lea ua maua le agaga ma le finagalo, o la ua tatou feaamagaloi. O le uiga lena ia tatou maua pea le filemu ma taotu agai i luma. Manuia le saunoaga a Tuuu, tatou agai i luma, aua le toe tilotilo i tua. Ma le agaga faaaloalo i le sui mamalu.

Susuga Hon Tuilaepa Fatialofa Auelua Sailele Malielegaoi: Lau Afioga i le Fofoga Fetalai, ou te tulai atu lava, se i e onosai, se i fai ma e onosai. Se i tuuavanoa mai i le Itu lenei, e tatau foi ona e manatua, o le aiatatau lea a faipule, e tatau ona faaali o latou taofi. Ae se i uma atu nai o matou manaoga. Aua a le maua, ona matou o lea e faasalalau i fafo atu o le Maota lenei. O le tuualalo lena i lau afioga.

FOFOGA FETALAI: O lea ua uma ona fai le faaiuga a le Nofoa. O lea ua maua, ae talitonu foi, o tatou e le...e manatu lava i le filemu ma le toamalie o tatou o Taitai o le Atunuu. E moni lava o tatou lagona ae ua uma na taimi. A tatou toe tepa i tua ma tatou mafaufau i ai, o se fafagu foi lena ia i tatou, ma avea ma a tatou avega mamafa.

O le fautuaga lava ia o le Nofoa, o tatou o tama o le Atunuu, o tatou o Taitai o le Atunuu. E talitonu lava o a mea ua tuanai, ia faatea. Ia o tatou agai pea i luma i le tatou galuega. O lea tatou te talanoa i le Tala o le tupe, ina ia faatino a tatou galuega e pei ona i ai.

O le fautuaga lea i sui mamalu, se tasi foi o sui matua aua le saunoaga.

Susuga Hon Tuilaepa Fatialofa Auelua Sailele Malielegaoi: E i ai le Itu lenei matou te lagolago. E lagolago le vaega lenei i le faagasologa o le tatou galuega. Ae i ai foi le mea, e tuutuuloloto i ai lau tofa. E le faapea o le a matou gugu i mea faaletonu. E tatau lava ona fai la matou tuualalo. A fai matou te gugu i mea faaletonu, ona le taunuu lea o a tatou tautoga ia sa fai i luma o le Atua. E pei o le tuualalo lena i lau afioga.

Susuga Hon Laauli Leuatea Polataivao Fosi: Lau Afioga i le Fofoga Fetalai, e fia maua se avanoa faamolemole.

Susuga Hon Tuilaepa Fatialofa Auelua Sailele Malielegaoi: O lea ou te agai sao atu lava i lau afioga ia lava lau onosai.

FOFOGA FETALAI: Ia, e leai e le o i le Nofoa foi se agaga e faapea i se isi itu po o se isi tulaga. O le tausia lava o le mamalu ma le toamalie o le Maota o le tiute lena o le Fofoga Fetalai. E tautau mau lava se faasoa ma se fesoasoani atu, e tautau le mau, a o le agaga atoa ia filemu lo tatou tauaofiaga.

O le mea lea, tatou agai i luma. O lea ua uma ona fai le faaiuga a le Nofoa e le mafai ona tatou toe o i tua, tatou agai i luma. O le tatou galuega i le aso lena ma o lea e faagasolo, o le Tala o le Tupe. O le mea lea, taatia o tatou lagona i mea ua tuanai, ae tatou agai i le lumanai mo le manuia o le Atunuu, o le lufilufiina o le Tala o le Tupe aua le tamaoiga o le Atunuu. Ae taatia ia o tatou lagona, ua tuanai na taimi ae tatou agai i luma.

Susuga Hon Tuilaepa Fatialofa Auelua Sailele Malielegaoi: Lau Afioga i le Fofoga Fetalai, e moni lava e lautele a tatou saunoaga

Susuga Hon Laauli Leuatea Polataivao Fosi: Lau Afioga i le Fofoga Fetalai, o le ala lea...

Susuga Hon Tuilaepa Fatialofa Auelua Sailele Malielegaoi: E na o le pau lea o le avanoa e mafai ona faatino ai.

FOFOGA FETALAI: Se i tulai mai le Minisita o Faatoaga ma Faigafaiva.

Alala mai i lalo le sui usufono lea. Ua solifono tele lau Afioga i le Taitai o le Itu Agai. Ua tauau ina le...o lea ua uma ona avatu le tala a le Nofoa, ma e le toe mafai foi ona toe see ese le tala a le Nofoa. Ia tatou tausii pea i a tatou Tulafono Tumau.

O le mea lea, e faamalulu atu foi i le Minisita o Faatoaga ma Faigafaiva. E i ai lava le manatu, ia tatou maua pea le toamalie ma le toafilemu o le Maota. E i ai le manatu, ia e leai o lea lava ua faafofoga mai le sui mamalu. E ui foi i le agiagi mai o le Taitai o le Itu Agai, ia a o lea foi ua faafofoga mai le Itu Agai, e le o alo lava le Nofoa latou ia i lona tulaga.

Ma ou te faailoa atu i le Maota, e tumau lava le Nofoa i lana faaiuga ma tatou Tulafono Tumau.

O le mea lea, faaaau mai le saunoaga a le sui mamalu.

Afioga Hon TAPUNUU NIKO LEE HANG: Ia faafetai lau afioga i le Fofoga Fetalai, e momoli atu foi vaimalu i puega pe afai ua tetena ni finagalo i se tala ua alu atu i lau lauga.

Ae lau afioga o lea e fua lau lauga i faamatalaga o le budget speech, i le mea lea na tuuina mai e le afioga i le Minisita, o le mission. O lea ou te fesiligia ai, taatia ia mea sa tutupu aua ou te le o toe fia ano i na mea. E pei ona ou tautala i le amata, ou te le toe fia tautalagia ia mea na tutupu.

Ae o le momoliga atu o se talosaga, ina ia fai ma se tulaga agai i luma. Aua e pei foi ona ou fai atu, e le tulaga malie foi lea tulaga, ae taatia ia lea mea. A o le tatalo, ina ia tagai i le latou mission po o le tou faamatalaga lea e aumai ina ia mulimulitai i ai. Na o se tuualalo, ae e le faapea ua ou fai atu tou te sese, po o le a se mea ua outou sese ai. Ia faamagalola lava le Atua i sese uma o tatou. Ae o le a see ese ma lea tulaga.

Lau Afioga i le Fofoga Fetalai, o lau fesili. O le isi au fesili, o lo o faataua foi i lau saunoaga le sauaina o tina ma tamaitai. O le saunoaga lava lea i totonu o le Tala o le Tupe lau afioga, ina ia tafiese nei uiga mataga, sauaina o tina ma tamaitai ma tamaiti.

Lau Afioga i le Minisita o Faamasinoga. O le a sau fua faatatau i le tulafono i saunoaga a le Afioga ia Laauli ina ia ave uma sui tamaitai o le Vaega a le HRPP.

Susuga Hon Laauli Leuatea Polataivao Fosi: Lau Afioga i le Fofoga Fetalai, o lenei foi o le a amata le taeao, o lea faatoa uma le tatou lotu.

FOFOGA FETALAI: E faamalulu atu i lau Afioga i le Minisita.

Susuga Hon Laauli Leuatea Polataivao Fosi: Aumai la se avanoa se i ou tali atu ai i le mataupu lea. E leaga o Papalii lava na faia le faaosoosoga lea, i le mea lea, na mafua ai le savali.

FOFOGA FETALAI: Ou te faamalulu atu, se le sui mamalu lea Tapunuu, se ua ou tapafua i lou suafa. O oe o le isi sui usufono matua, ae o le a tauau ina faatamaitiiti lau saunoaga. Ia e alofa mai i le Nofoa, o lea e tuutumalu le Nofoa. Se taatia ia na mea, o mea ua tuana'i, o lenei lava e te fai ma e tepa i tua. Ioe, o le mea lea, se agai sao i le Tala o le tupe, o oe foi sa e Minisita o Tupe. O lenei e te silafia aua se manuia o le Atunuu. Taatia ia na mea, ou te le toe talia se saunoaga faapena faamolemole.

Tofa Olo Fiti Afoa Vaai (Salega 2): Lau Afioga i le Fofoga Fetalai,

FOFOGA FETALAI: E i ai se...

Tofa Olo Fiti Afoa Vaai: Ioe, na o si mea lea e fia faamalamalama.

FOFOGA FETALAI: Se mea tau tupe pe o se mea....

Tofa Olo Fiti Afoa Vaai: E faauilavea atu i le sui usufono o lo o saunoa nei. O le mea lena na leaga ai lau afioga i le Fofoga Fetalai, o lou toe nofo ma aveese le suafa Papalii sa mamalu ai ana saunoaga. O lea ua Tapunuu, ua tapuitiiti le mea.

FOFOGA FETALAI: Soia ia, lau Afioga i le Minisita soia, taatia pea lenei aiga. Ae saunoa, o le mea foi lea e tupu ai le lote o taua o le...saunoa i le tatou Tala i le tupe.

Susuga Hon TAPUNUU NIKO LEE HANG: E alu lava lenei aso o ou faatoese ma ou faamalulu atu i lau afioga. E le i leva ona ou, talia ai lau talosaga ia maua e i tatou se filemu. A o lea ua amata lava ona tutulai mai la outou vaega e faavevesi le Fono.

O lea ou te fesili i le Minisita o Faamasinoga, ae o lea e tulai mai le Minisita o Faatoaga, fesoasoani mai le Minisita o Galuega,

Tofa Olo Fiti Afoa Vaai: Lau Afioga I le Fofoga Fetalai. O le mea e fia faasao lau afioga, aua o lea e taua le suafa. Lau Afioga i le Fofoga Fetalai, se i silasila lau Afioga i le sui mamalu, o lea saausi lava le matou faalogologo, e le faapena la outou mea sa fai a o outou i i. E tai lua lava au fuaiupu, outou tutu i luga, o mea e fia faasao. Ae vaai i ai i le faaaloalo. E faaaloalo se i saausi a outou saunoaga, ma matou faalogologo ona matou tali atu lea. A o lea ua e toe ita mai ia te au. Ae manatua lau Afioga i le sui mamalu. O au a umi lau lauga o ou saofai mai i ina, o le 7 minute. Ua laki outou, se i vaai ua 34 ou minute talu ona e lauga.

FOFOGA FETALAI: Malie ia le sui, lau Afioga i le Minisita, o lea foi ua tatau ona lagona mai e Tapunuu lenei mea e taofi atu ai le Nofoa. Faaauau ia lau saunoaga i le Tala o le tupe. Soia ia e te toe oo i isi mea...

Afioga Hon TAPUNUU NIKO LEE HANG: O le talosaga i lau afioga, se taofi ia le faauilavea. Ne i mea ane ua uma lou taimi, e le i taitai lava ona uma lau lauga. O le talosaga lea ma le agaga faaaloalo. O lea na ou fesiligia....

Afioga Hon Fiamē Naomi Mataafa: Lau Afioga i le Fofoga Fetalai,

FOFOGA FETALAI: Tulai mai le Afioga i le Palemia.

Afioga Hon Fiame Naomi Mataafa: O le mea e fia faamalamalama i le saunoaga a le sui mamalu. E matauina ma le faanoanoa le faaogaina o mataupu tau tamaitai. O le tatou malaga lava lea na ui mai ai, mai i faapea o tamaitai ua sauaina, o tamaitai ua a ma a, valaau tamaitai o le Atunuu e afifio mai. E faapolokiki e outou le itupa lea. O se alofa ea lena mea? A faapea e saunoa le sui mamalu i ni upu a Laauli na fai, ae fia upu o lo o fai e le Taitai o lo outou vaega? O fai atu ai se isi? Faaeteete i le mea lena, a outou fai mai tou te alolofa i le itupa o tamaitai, then stop politicizing. Saunoa mai i mea aoga ma anoa e puipuia ai tamaitai. A o le alu lava lea o lea fai mai...ua galo ia oe upu a Tuilaepa.....fai i totonu o le Maota lena.

Susuga Hon Tuilaepa Fatialofa Auelua Sailele Malielegaoi: Lau Afioga i le Fofoga Fetalai..

FOFOGA FETALAI: Onosai mai lau Afioga i le Taitai o le Itu Agai. Se i afu le saunoaga a le Palemia.

Afioga Hon Fiame Naomi Mataafa: O le uiga lena o outou, faalagilagi ma aumai i luma tamaitai, ae toe fai foi a outou upu ma aoai. O le mea lea lau Afioga i le Fofoga Fetalai, a faapea ua tautalagia, fai tutusa, fai tutusa.

Susuga Hon Tuilaepa Fatialofa Auelua Sailele Malielegaoi: Ou te fia fesili atu po o a upu ia.

FOFOGA FETALAI: O lea ua maua le finagalo o le Palemia. Ou te talitonu foi e le tau avatua i lena itu, o tamaitai o tatou feagaiga. O le mea lea, tatou uma lava na outou soifua ma tatou ola mai i aiga faifeagaiga. O le mea lea, Tapunuu, taatia ia le itupa vaivai o tamaitai ae saunoa sao i le Tala o le tupe aua se manuia o le tatou Atunuu.

Afioga Hon TAPUNUU NIKO LEE HANG: Faafetai i lau Afioga i le Fofoga Fetalai, pei ona ou faamatalaina atu, o lea ou te talanoa atu i le budget speech, o le vaega o le Tala o le Tupe. E i ai la manatu taua lea na faaali mai e le Minisita o Tupe, e aafia ai le sauaina o tamaitai. A silasila i le tulaga lena, ou te le o talanoa atu i nisi mataupu. O lea ou te talanoa atu agai i luma se tulaga e fesoasoani i le sauaina o tina ma tamaitai.

O lou talitonuga, ia faatulou atu i lou uso ia Laauli, le tofa matua, ona o saunoaga ia na fai i le TV, lea ou te....ae taatia ia na mea.

O le taumafaiga lea e tuuina atu, e avea se fautuaga i le Minisita o Tina ma Tamaitai, se i fesoasoani ifo i lena mataupu. E leaga o saunoaga ia ou te talitonu e faatupulaia i le tulaga lea. Taumafai outou e tape, e na o se fautuaga ae taatia atu i ina pe talia lea fautuaga pe lei.

Ae faanoanoa lava i le tutulai soo mai o la outou vaega, ae leai lava ma se leaga o lau lauga o lea e base lava i luga o faamatalaga lea e i i. Ia faamalie atu ai, pe a ua sese se faamatalaga.

Lau Afioga i le Fofoga Fetalai, e i ai le isi vaega o le mea lava lea, o le a aveese.

Lau Afioga i le Minisita o Leoleo, lou uso lau Afioga Faualo. Na o le fesili atu lava ae le fai ai. Pe le solitulafono ia saunoaga faapea, e na o le fesili lava ae aua le aumaia se tali ae taatia atu i lau Afioga, ne i te i ua toe vevesi la tatou Fonotaga.

Lau Afioga i le Minisita o tupe, e lua ni vaega o tupe, e tai \$250,000 o lo o fuafuaina mo...se i lau atu le mea lea e i totonu e manino ai le tulaga lea.

Afioga Hon Fiame Naomi Mataafa: Lau Afioga i le Fofoga Fetalai, o le mea e fia faasao, o le sui mamalu lea, o le sui leva o le Maota. E matau atu i lana saunoaga, e pei o lea ua laa i le vaega lona 3 o le tatou galuega o mataupu auiliili. E le pei o le saunoaga i tulaga lautetele o Faiga Faavae ma tulaga faapena.

FOFOGA FETALAI: E pei o le agaga foi lena, e faafetai i lau Afioga i le Palemia. E pei o le agaga foi lena e fesoasoani atu ai i le sui mamalu. Ua leva ona e Minisita foi o Tupe. E te silafia, o le taimi lena na o tatou lauga faalauaitetele. E i ai lava le taimi o le auiliiliga, o le avanoa lena e oo ai i tulaga ia. Ma le agaga faaaloalo.

Susuga Hon TAPUNUU NIKO LEE HANG: Lau Afioga i le Fofoga Fetalai, e sao le saunoaga a le Palemia. O lea ou te malamalama ae leaga o lea e aumai i le faamatalaga o le budget speech o mea o le aotelega. Ou te le o lauga i ni mea taitasi i totonu o le Tala o le Tupe. O lea foi ua e aumaia lo matou avanoa, e maua o matou avanoa, ae le maua ni avanoa faapea. A uma lau lauga e le afea ia mea, ia maua sou avanoa i mea taitasi. O le mea la lea e tau momoli atu ai mea ia ou te matauina i le aotelega o le saunoaga a le Minisita. Ae taatia atu faapena.

O lea e avatu lau fautuaga, e afa miliona e alu i nei mea. Suesuega ia tuufaatasi ai lipoti faaletausaga a Faalapotopotoga ma Matagaluega, ia ma se suesuega ma iloiloga i luga o taunitupe, lea e tau ai le upu faapapalagi o le Forensic Audit. O lau fesili lau Afioga o lou malamalamaga i mea e tau o Forensic, e suesueina ai tagata ua maliliu se i tulou. O le a tonu le mafuaaga na maliu ai le tagata.

O lea ou te vaai atu la i terms fou ia. O lona uiga ua matua sailiili lava e suesue le Tala o le Tupe, lipoti o le tupe, e pei o la e suesue se tagata ua maliu se i tulou. Na o se fautuaga, a faapea o lea ou te vaai atu e afa miliona le tupe e faaalu i consultant, o lea ou te avanoa, pe a outou manaomia lau fesoasoani. E fai fua, free on charge.

Tofa Olo Fiti Afoa Vaai: Lau Afioga i le Fofoga Fetalai, o le mea e fia faasao. E masalo a ou mataua le sui mamalu masalo ua ova ma le sefulu tausaga o Minisita o Tupe, mai i le Faigamalo. Ae le toe malamalama i le faitauina o Tala o le Tupe.

Susuga Hon TAPUNUU NIKO LEE HANG: O le mea e fia faasao, e na o le lima (5) lava tausaga sa ou Minisita o tupe ai, e le sefulu (10) tausaga. Se ua leva foi ona e i totonu, ua tataua ona e malamalama i mea ia. Ae na e fai mai na faamatalaga pepelo. Se soia e te talapepelo.

Ia, lau Afioga i le Fofoga Fetalai, na ona ou tuualalo atu, se soia tou te faalavelave. Ua tauau ina galo le tele o le lauga sa tapena. E pei o tulaga na, a faapea la o le a alu se afa miliona, e toe faaaoga e fai ai ni suesuega faapea. O lea ou te faamaonia, o la e up to date lava lipoti o Tala o le Tupe mai Faalapotopotoga ma Matagaluega. Ae o le a le mafuaaga o le a toe faaalua ai lenei \$250,000. Ou te iloa o lea e i ai alii faapitoa iinei, o le afioga ia Leota o le isi Suetusi Silisili lena e fesoasoani i lau galuega pe a faapea ua outou manaomia ni consultants ua faaalua ai le afa miliona. A o lea ou te avanoa pe a faapea e manaomia lau fesoasoani. O le isi la mea lea e faamalulu atu i lau Afioga, leaga o lena ua aumai lau faatonuga...

FOFOGA FETALAI: O se mea agai i luma po o se mea i tua.

Afioga Hon TAPUNUU NIKO LEE HANG: O le mea amata. E afa luma afa tua.

FOFOGA FETALAI: Na o mea agai i luma lau Afioga, e le toe manaomia tua.

Afioga Hon TAPUNUU NIKO LEE HANG: Pei lava e afa tua faamolemole, ona o le fesili soo o au e lou itumalo, ae pau le mea la ua faafogafoga mai i le tatou miliona foi lele. Pau lava lau tali na fai i lou itumalo, onosai se i pasia le Tala o le Tupe, faaau loa lea o le miti lea a Laauli sa fai. Aua o lea foi, ou te faasaoa foi le saunoaga a Laauli, e le i faia e Laauli se tala o se tufa. Na pau lava le tala a Laauli na ou faalogo i ai i le latou roadshow, o le a tapena se fesoasoani tai miliona, 5 tausaga e tufa lava i tausaga uma, e ave i itumalo. O lea la ou te faafetai ai i lenei foi faamanuiaga. Pau lava o lea, e i ai ni tulaga o ni conditions, aua e tautino atu i lau Afioga Laauli, e leai ni fanua o le matou itumalo. E faapefea la ona o e atiae pe a leai ni fanua? E maua mai ai ma ni fanua pe a maua le miliona?

FOFOGA FETALAI: Leaga o lea ua taua le suafa o le Minisita.

Susuga Hon Laauli Leuatea Polataivao Fosi: Ia, se i ou toe tu atu ia e faamalamalama. O le faamalamalama faasefulu lea o lenei mataupu. Lau Afioga i le Papaliitele, o le suafa lena ou te iloa e ese lou faaaloalo i ai. O lea foi ua toe taua le mataupu lenei, e le o se mea na faataetaealuga le mataupu lenei. Ma e le olegia foi le atunuu i le mataupu lenei i le miliona lau Afioga i le Fofoga Fetalai. A o outou lava ia na outou o talai. E faapefea ona fai? O fea e faatupe ai? O le a le mea e olegia ai le atunuu? Ia lea ua ou fai atu, “Papalii, faatoa ono lenei o vaiaso talu ona tulai le Malo fou.” O lea matou te fofu le tele o le gasu lea e tau faavasega. Tuu mai la le avanoa, you have been there as a Minister of Finance. Tuu mai le avanoa se i tau fofu le mataupu. A o lou tulaga faapea e te masalosalo, aua ne i e masalosalo. E eseese faleaoga na tatou aoga ai. O upu sao lena. E ui lava ina tou o ma lalau fai mai e valea le FAST e le atoa se ono masina, ia, taatia maia. Malilie ia, taatia maia se i taumafai atu lenei Itu po o le a le auala e faatino ai le tatou mataupu.

Samoa ma lau faafofoga, o lau toe tu mulimuli atu lava lenei i le tautinoga lenei. Leaga o au na fai le tautinoga. E faatino le miliona tala mo poloketi a itumalo. Ae pule outou po o le a le tou talaiga e toe fai foi nanei. O nanei foi sau le tou tipoti koko, ia ma talai le mea lea e le taunuu, e le taunuu, e le taunuu. Ae pei o le agaga lena. Na alu ananafi o pisa, e le taunuu.

Lau Afioga i le Fofoga Fetalai, Samoa ma lau faafofoga, e taunuu.

FOFOGA FETALAI: Ia faafetai o lea ua manino lea tulaga.

Afioga Peseta Vaifou Tevagaena (Faasaleleaga 5): Lau Afioga i le Fofoga Fetalai...

FOFOGA FETALAI: E te faauilavea i le sui usufono lea e saunoa pe e te faauilavea i le faauilavea lea.

Afioga Peseta Vaifou Tevagaena: O lo o ou faalogologo atu i lau Afioga.

FOFOGA FETALAI: Ioe, pe e te faauilavea i le sui lea na faauilavea pe e te faauilavea i le sui usufono lea na saunoa.

Afioga Peseta Vaifou Tevagaena: Ou te faauilavea i le saunoaga a...

FOFOGA FETALAI: Ia, e le talia i tatou Tulafono Tumau, e le talia. Alaala mai i lalo le sui usufono.

Afioga Peseta Vaifou Tevagaena: Laauli, malie ia, ae feel the heat.

Susuga Hon Laauli Leuatea Polataivao Fosi: Lau Afioga, tuu ta mataupu ta o i le court. O taua lava ia o le court, aua ta te fetai i i o taua o le uso.

FOFOGA FETALAI: Ia, malilie ia oulua le uso, se i faaauau le saunoaga a Tapunuu. Tapunuu, toe tasi minute...

Afioga Hon TAPUNUU NIKO LEE HANG: Lau Afioga, ou te talitonu lava lou minute o le a...

Susuga Hon Tuilaepa Fatialofa Auelua Sailele Malielegaoi: Lau Afioga i le Fofoga Fetalai, o lea ou te tulai atu pe toe tasi moni le minute po o...

FOFOGA FETALAI: Ia, o lenei lava e fai i le tatou avafatafata le tatou galuega. E tasi lava a o le isi tasi ua tosotoso atu ai lava. Ae tau o se mea e tau atu, toe tasi lou minute Tapunuu, ae fai faatamalii le tatou galuega.

Susuga Hon Tuilaepa Fatialofa Auelua Sailele Malielegaoi: Ia o lea la ou te tulai atu lau Afioga, *Toe faaopoopo ni nai ana minute ona o lea ua tele le taimi ua alu i mea malie ia sa fai nei.*

Faaluaina e le Sui Taitai o le Itu Agai, sui usufono mo Anoamaa 2.

FOFOGA FETALAI: Ia, leaga ou te iloa o lea ua faatu le lafo ma ua faaluaina.

E le i tuuina atu le maliega autasi a le Maota i le lafo.

FOFOGA FETALAI: Ia, malie ia Tapunuu faaauau maia le saunoaga o lea ua faafofoga mai.

Afioga Hon TAPUNUU NIKO LEE HANG: Faafetai i lau Afioga i le Fofoga Fetalai. E talitonu lava...

Susuga Hon Tuilaepa Fatialofa Auelua Sailele Malielegaoi: Lau Afioga i le Fofoga Fetalai a o le i saunoa le Afioga i le sui usufono, e leai, sa ou matau mai i le faasologa o saunoaga a le la foi itu, sa tuufau lava. O lea la sa ou manatu ai, o le a i ai se avanoa e fetuunai ai foi lau tofa ina ia tutusa avanoa e tuu mai i sui o lenei foi Itu.

FOFOGA FETALAI: Ia, pei lava ona fai atu, ona o lea ua faatu le tatou lafo. Afai foi o le a se foi faafogafoga mai a le la Itu, o lea lava e tuuavanao i tatou sui usufono e fou mai totonu o le Maota. A o tatou lava ia o sui

usufono ua matutua, ou te talitonu lava o lea ua talafeagai lava le taimi. Ia saunoa maia Tapunuu.

Afioga Hon TAPUNUU NIKO LEE HANG: Faafetai i lau Afioga i le Fofoga Fetalai. Ae le i pasiaina le lafo ou te talitonu lava o lena e luelue mai lou ao ona o le ta va faa-Papalii. Ae faafetai mo le avanoa e toe faaauuina ai le lauga matagofie. O le lauga mo fautuaga, ona i lau matau, ou te le faaitiitia foi le taua o Afioga i Minisita, ona o lau matau, e fou uma nai Minisita ia i totonu o le Palemene. A o fautuaga lelei ia mai toeiaina o le Palemene e avea ma fautuaga, a le faaaogaina faafetai, a faaoga viia le Atua. Ae pei o le agaga lena lau Afioga, e le o faatautee atu, ae pau le mea o fautuaga. O le aoga lena o le matou vaega Opposition, e faufautua, faufautua, faufautua, a le talia lava, ia pule lava outou. Ae o lau fautuaga mo le... pe a faapea ona o lea ua saunoa manino lava Laauli, e taunuu mea ia. A o lau fautuaga, ina ia follow mea o accounting principles i le faafoeina o le tupe lea. Ina ia manatua le transparency and accountability, o golden roles na o mea nei o tapenaga o faamatalaga o tupe. Ae o lau fautuaga, ave i le Matagaluega o Tupe e faasoasoina mai le miliona lea i le itumalo. Na o se tuualalo ma se fautuaga, ae fai lava lo outou finagalo i le mea tou te talitonu e faatino ai lea faamanuiaga, oka se manaia o lea faamanuiaga. Viia le Alii.

Ia, ona ou oo mai lea i lau Afioga leaga o lea foi sa saunoa le Minisita i tatou aitalafu. Lau Afioga i le Fofoga Fetalai ma le mamalu o sui usufono o le Palemene, e fia taua nisi o faamatalaga sa saunoa ai le Afioga i le Miisita o Tupe i lana lauga e faatatau i nogatupe a le Malo, sa ia faapea ai ua latou amoina po o le inherits aitalafu a le faigamalo talu ai ma faapea mai ua ausia le tapulaa e 50% o fuafuaga e fua i le tamaoaiga.

Lau Afioga i le Fofoga Fetalai, i lau sailiiliga i le taimi nei, ua pau i le 48% le tuufaatasiga o aitalafu atoa a le tatou Malo, e fua i le tamaoaiga. Ma o lo o tausisia faiga faavae tau tupe a le Malo e pei ona faataoto i lalo o faamatalaga o fuafuaga mo tupe a le Malo, po o le physical strategy statement. I tausaga uma mo le silafia foi, o le 40% o le fua tapulaa o aitalafu, e faatusa i le tamaoaiga, o se fuafuaga mamao lea e taua o le long term plan, ma e tatau ona ausia i totonu o le 10 tausaga o lumanai. E ese mai le physical statement i tausaga taitasi.

Lau Afioga i le Fofoga Fetalai, o se lafoga soonafai lenei faamatalaga, ona o mafuaaga lenei, o Samoa o lo o faatulaga o se atunuu e laitiiti ma maaleale lona tamaoaiga, ma e matuai aafia gofie lava i mala faalenatura faapea faamai pipisi ma le tulaga faaletonu o le tamaoaiga o le lalolagi. E leai ni o tatou punaoa faalenatura tatou te tua i ai seivagana le gataifale ma faigafaiva ma ona laufanua meamata o lo o faatino ai atinae tau faatoaga. A toe tomanatu, o se vaitau o le tausaga e 2007 na aafia ai le tamaoaiga o le lalolagi le global financial crisis ma sa aafia ai ma Samoa sosoo ai ma le Tsunami i le tausaga e 2009. O le tausaga e 2012 e oo mai i le tausaga e 2018, e aafia

lava i tatou i matagi, afa, lologa faapea suiga ogaoga o le tau i tausaga taitasi ma e moomia tupe faaagaaga a le Malo e toe faaleleia ai aseta sa faaleagaina faapea atinae sa faatino, toe faataavili ai le tamaoiga pe stimulate ai le economy. O lo o faaauau pea ona agalelei mai a tatou paaga, ae peitai, e i ai foi le tatou pitolaau e tatau ona faatino, ma e faatupe atinae tetele nei i aitalafu pe afai e le auau le tatou faasoa i tatou lava tupe, i tupe maua masani. O aitalafu ma gaoioiga masani nei a so o se atunuu o le lalolagi, e oo lava i Amerika ma Peretania tele, o lo o faia foi a latou nonogatupe e faatupe ai le atinae ma fesoasoani i le tamaoiga pe a aafia. O tatou foi taitoatasi, e moomia foi aitalafu mo a tatou atinae pe a le lava le tatou faasoa. Afai o le a i ai sau aitalafu, e sao ai le tala...

FOFOGA FETALAI: Se i malie lava le sui usufono... Se i faafesili atu lava po o le lauga a ai lena e te faitaua, po o lau lauga po o le lauga a le Minisita?

Afioga Hon TAPUNUU NIKO LEE HANG: O au sailiiliga lau Afioga.

FOFOGA FETALAI: Oi o au sailiiliga?

Afioga Hon TAPUNUU NIKO LEE HANG: Lea ua tuufaatasi i le pepa, leaga e taua ina ia manino ai le tulaga o le tatou aitalafu mo le silafia e le mamalu o le Palemene.

FOFOGA FETALAI: Ia o lea ua... E talitonu lava ua ...

Afioga Hon TAPUNUU NIKO LEE HANG: E le tau tusia e se isi lau lauga lau Afioga.

Afioga Hon Fiamē Naomi Mataafa: Lau Afioga i le Fofoga Fetalai, ua uma le lafo ua aumai le fesili. O le a le ave faia foi le lua faia ma Papalii Niko o le a faaumiumi ai lava lana lauga ua uma ona taatia le lafo. Faamolemole lau Afioga, usitaia le lafo a le Maota ua fai.

FOFOGA FETALAI: Ia, o lea ua saunoa mai le Palemia. Se ou te talitonu foi o lea ua manatu, faauma maia lau saunoaga Tapunuu. Taatia ia lau sailiiliga lena atonu lava e aoga e fautua, e faapena ona ave le fautuaga i le Minisita o Tupe. Atonu o la e foi ua oo i letaimi o le Minisita o Tupe ia se i faaoga foi ana ia metotia, ae aoga foi nai au suesuega, e fesoasoani foi i le Minisita o Tupe. O le tiute lena o tatou e fai faatasi.

O le mea lea, ia faauma maia lau saunoaga Tapunuu ua uma lou taimi.

Afioga Hon TAPUNUU NIKO LEE HANG: Faafetai lava. Ne i te i ua matau mai e le Afioga i le Palemia se ta sootaga vavalalata e tuuavanoa mai ai. E faamalie atu pe a o le tulaga lea ua tuuaiina ai taua, ae le afaina, o mea lava a ua uma lava le taimi, o le a faauma atu lau Afioga. Toe lua lava nai parakalafa lea maea loa.

Lau Afioga, e ao foi ina faamanino a oo loa i talanoaga o aitalafu e faatauaina le malosi e toe totogiina ai le aitalafu po o le debt service ratio lea e faatulaga ai a tatou taiala e tatau ona i lalo ifo o le 20% e faatusa i le tamaoaiga.

I lalo o le faigamalo a le HRPP, e 11% i le 12% e tausia i le alafua lea i tausaga taitasi uma...

FOFOGA FETALAI: Ia, ou te fautua atu i le sui usufono, e le gata ua uma le taimi, a o lo o faitau lau lauga e faasa i le tatou Tulafono Tumau. E pei o le mea tonu lava lena o lea ou te fautua ai o oe o se tasi o sui usufono matua o le Maota. E talitonu lava o lea ua tatou taunuu mai, se e alofa tele ia oe le sui usufono mamalu, ae ua manatu, o lo o lava a le taimi pe a faitau auiliili le Tala o le Tupe e maua ai se isi avanoa e ave ai se fautuaga.

Afioga Hon TAPUNUU NIKO LEE HANG: Lau Afioga faamolemole se i faatalofa i lou itumalo ma faafetai i ai. E maua se avanoa?

FOFOGA FETALAI: Ia, faapai loa i lou itumalo ma faauma ai loa lau saunoaga ma...

Afioga Hon TAPUNUU NIKO LEE HANG: A o faafofoga mai lou itumalo Vaimauga Nu.3, o lea ua uma lou taimi. Atonu e i ai se isi taimi faauma atu le lauga a le tou sui usufono. Ia agalelei le Atua. Faafetai mo le faaeaina o lou nei tagata faatauavaa i le tou filifiliina o lenei sui usufono e avea ma tou sui usufono mo le 5 tausaga. Ia viia lava le Atua. Agalelei le Atua, faamanuia i le tatou itumalo i tupu ma ee, faapea auauna a le Atua aemaise le mamalu o faletua ma tausi ma le malosi o tatou nuu taitasi. Faamanuia foi le Atua i lau Afioga, ia maua pea sou atamai e faataunuu ai, e le faigofie lou valaauina. Ae tasi lava le tatou faamoemoega, o tatou uma lava, na o le Atua lava tatou te faamoemoe i ai. Ia viia le Atua. Faafetai mo le avanoa.

Na faaalua le agaga fiafia o le Maota i le patipati o latou aao i le maea ai o le Saunoaga a le sui usufono mo Vaimauga 3.

FOFOGA FETALAI: Faafetai. Ia, faamalo saunoa i lau Afioga i le sui usufono mamalu. Ia e talitonu lava e ese foi uiga tamalii e faaalua pea e lau Afioga i le sui usufono mamalu. E ui lava ina tele ia faauilavea ma o lo o

tumau pea ou uiga tamalii. O le mea lea faafetai tele lava Tapunuu aua e faigata o lau Susuga Papalii, faafetai o lena lava e le o aveesea foliga o le tatou aiga, o le faatamalii lava e manuia ai mea uma.

O le mea lea, ia manuia lau Afioga i le sui usufono mamalu, ua faafogafoga foi lou itumalo, e leai o lea lava ua faasoa lou... ia o le a foi se taleni ma se meaalofa a le Atua, a o lea ua oo mai lava lau faasoa i si ou tuafafine o lea ua Minisita o Tupe e ave i ai le tatou faasoa ma le tatou fesoasoani mo le manuia o le tatou atunuu. O le mea lea faafetai tele le faasoa. Malo mo le lauga.

Ia, o lea ua matau atu ua tulai mai se tasi foi o sui usufono matua o le tatou Maota, mai Sagaga Nu.3, Hon Sala Fata Pinati o se tasi o tama matua o le Maota ua loa foi le tautua aua foi le auaunaga a le tatou atunuu aemaise foi o le tatou Malo.

O le mea lea, ia saunoa ia lau Afioga i le Tama Matua.

Afioga Hon SALA FATA PINATI (Sagaga 3): E faatalofa atu i lau Afioga i le Fofoga Fetalai i lenei taeao. Le paia e o le Maota, o au e lua ou vae. O le lua ia o ou vae ou te faatusa, e lua foi itumalo ou te sau ai, o Gagaemauga lea e afio mai ai Tuala e faasino tonu i ai lou nei tagata.

O le Tulafono lea ua i ai nei le suiga o itumalo, e tasi lava le aso e faaaoga ai. E tasi lava le aso e faaaoga ai suiga o itumalo ae toe foi lava le matou nuu i Gagaemauga. Ua taua nei la matou o Sagaga 3. Ia o aga lava o le palota na fai ai.

Ae i nei avanoa e muamua ou faapea atu, faafetai i le Afioga ia Tuala. Se i tulou lava le Maota nei ma le faafofogaaga a Samoa. E mitamita foi lou nei tagata ona o itu nei. E le o toe... o lena ua faafofoga Samoa ma ua silafia e Samoa ua lua tofi o le matou itumalo. O Savaii i Gagaemauga, Samalaeulu, Patamea ma Mauga, lea e taua ua tuufaatasi ma Saleaula.

I le 2006, sa ou nofoia ai le Nofoa o le itumalo. O matou nei na i ai i le itumalo i le Nofoaiga lenei, sa matou i inei i le Maota. O le Afioga ia Laauli ma le Afioga ia Olo, o Lealailepule, o le Susuga ia Moefaauo ma Loau lea Keneti Sio. O i ina na foafoa mai ai se Nofoa ma sa ave i ai se talosaga a lou nei sui usufono ia vavae lo matou itumalo, aua o le mea moni lava ia, ou te le iloa pe faapefea ona oo i Savaii se tofi o le matou itumalo. Ae peitai, o lenei ua saofai ai, lea ua afio ai Tuala. Tuala, e eseese a mea o lo o ta nonofo ai, o lena ua aveae oe ma Minisita a o lea ou te saofai atu i i, malo le fai o le faiva, malo tau, malo finau.

Lau Afioga i le Fofoga Fetalai, faamalo le... e le faigofie le galuega o lo o feagai ma oe. Ma e avatu ai lau faafetai. Ou te faamalo ma avatu le faafetai i le Afioga i le Palemia. Ia ne i meaane faapea Fiamē, a o lea e fai mai o sou tei, ae faafetai o lea ua tofia le tamaitai o le uluai Palemia tamaitai lea. A, se ua ta fiafia lava. Ioe. Atonu o faapea Fiamē, o lea ua seluselu mai le alii lea

o Sala ia te au. Faafetai i le Aiga Kapeneta faapea foi sui usufono mamalu o lena itu, Minisita Lagolago.

Liliu mai i le ituvai o lenei itu, le afio o lau Afioga Tuilaepa, o lo matou taitai lea o le Vaega Faaupufai e Puipuia Aia Tatau a Tagata. E avatu foi le faafetai ma le faamalo i Ofisa Sili o Pulega o Matagaluega eseese o le tatou Malo o lo o faatasi mai. Malo e le faigofie le galuega. Ae aua tou te popole ailoga e tutulia e Fiamē ma le Aiga Minisita le galuega... ia outou, o le galuega e fai mo Samoa. Ma ou te talitonu foi, o le agaga lea o lo o faapea ona tauave e i latou nei.

Lau Afioga i le ava tele ma le migao ou te faamaualalo atu ai i lou solituina o lo outou paia i lenei taeao, ioe. Ou te talitonu o le Maota lenei o le Maota na tofi i ai tatou, tofi tatou te o tatou itumalo, avea tatou ma leo e faaleo ai mea o lo o finagalo i ai itumalo eseese aua le faaleleia o Samoa. Ia ma le tulaga o atinae eseese e pei ona faalauiloa mai.

Ae muamua ona ou toe faatulou atu ma ou faapea atu, o le a ou le oo lava i paia o Samoa ma ona tulaga ia. Ou te talitonu o lea ua i le Maota nei ma ua faafofoga foi Samoa o lea ua uma ona pai i ai isi sui usufono i lenei taeao.

O le Tala o le Tupe e pei ona folasia i inei i le Maota. O le a le oo i ai se leo o au nei, aua foi o le mea lava ia ua masani ai le Maota, o le lava ua tu i le foe, e pule lava ia i le latou faasoā. Na pau lava lea mea avatu ia i matou nei, na o le tuualalo ma le avatu o fautuaga. A tele foi fautuaga, e lelei le fautuaga. E le avatua foi ni faafitauli ona faapea lea, leai la o lea e lelei mea uma. Silasila foi po o le a lava se mea e te faia, e tatau lava ona faapea mai, e le o atoa, e le o i ai le atoatoa i mea uma na. A o le matua alofa, e fautua i le fanau. I le taimi nei, o le matua lea ua i le Aiga Minisita ma le Palemia, ua matua i ai le Maota e faapea foi le atunuu. A o a foi la ni tala a o se fautuaga e avatu, ia logosaia, tatou logosaia ia vaega, aua o le tofi o tatou, e le milia faauu upu o le sailiga o le tatou lumanai o samoa, e fai lava fai i le mea e tau i ai, a ia taunuu i se taunuuga lelei. O le a la le taunuuga o ia mea? O i tatou e avatua le Tulafono, o le faatinoga o le galuega o lo o i Ofisa Sili o Pulega o Matagaluega.

O le taua o lenei aso, o lea e afifio mai ma alaala mai. Aua a pau se faigamalo, po o se galuega e fai e le Minisita, ou te talitonu e le o le Minisita e pau i ai, e pau ia i latou o lo o faauluulu i ai galuega a le Malo. Ona faapea ai lea o le tala po o se manatu foi, se e leaga le faigamalo. Ia e fiu lava foi e alu atu i le Minisita e le faia le galuega e fai ai. Ia silasila i le mea lea e tau atu, o le afaigaluega e faatinoa. Aua e i ai le pule e tu alu fai le galuega. Ae i ai le pule e avatu le galuega na o le saofai pasi le pepa ona le tino mai lea o le galuega e pei ona i ai le faamoemoe. O le a le amataga o nei mea uma? O le fai mea fiafia. Fai fiafia le tatou galuega. Ioe. Ia, masalo o lena ua... leaga e fou mai le toatele, ae o lau tali masani lava a o ou saofai foi i o, lafo maia le tou fanoga e pei ona i ai. O a uma mea tou te saunoa i ai, fai, ae taumafai lava e faatino uma mea uma nei. Aua foi leaga e le mo au le tuualalo

lea e aumai ia te au, ae mo le atunuu. Tofi tatou e tatou itumalo, o le leo lea o au, o le leo lea o le matou sui usufono lea. Aua la ne i tatou olegia o tatou tagata. O le lagona, o se tuualalo, i sui usufono uma lava o le Palemene, o le ala lea e ala ai ona pauu le toatele, e ese le polomisi e fai, tautalagia i fafo e manao e fia sau i totonu o le Maota lenei. E i ai le upu faapapalagi lea e tau o le walk the talk. E fai au folafolaga i tua, ae ia e manatua lelei, a uma le 5 tausaga e le tino mai, e le faataunuua, ona e malie lea e te le toe saofai i i le Maota lenei. Ma o le Maota lenei o mea sasao lava e fai ai. E te le sau e olegia le itumalo. O eseese foi o tatou talitonuga i le FAST ma le HRPP, e le alu atu le Pati e fai oe i lou itumalo pe a oo ina faatasitasi nuu aemaise o le fono tele a itumalo, ia po o se pitonuu foi e faapena.

A fonoa loa itumalo, ona fesiligia lea o le latou sui usufono, o a mai oe alii, o afea ea e fai ai le mea lea? Ia malilie, o le a ou taumafai lava e fai. Ma o le mea moni lava, e le malo le tupe, e malo lou tautua nuu, tautala i le mea sao, fai le mea tonu, fai alofa. O i ina le auala i le pule. O le ala i le pule o le a? O le tautua. Ioe.

O lenei la taeao, ou te faapea atu ai, welcome, welcome you all i le malae o Samoa. Aua o i lava, po o le a le tele o au tupe, a e le nofoia le Nofoa e maumau. E le taua le tupe ae taua oe i au galuega faatino i aso uma.

Ou te le fai atu se tala, ae ou te faafetai, leaga o le Atua e pule, o le Atua e to mai ai manuia. O le ala foi lea ou te saofai atu ai, o le fa (4) lenei o Paeaiga o ou saofai atu ai i i. Ua maea foi se galuega, a uma loa le lima (5) lenei, sa ou faapea o le lima (5) lenei o le a ou sau ou te tafao ai, sei tulou le faafofogaaga a le matou itumalo, i le faapea ou te sau ou te tafao. E leai, o upu lava ia o upu faatafao le tala ma upu e faamalie ai.

A o lau galuega e te faia, e fai mo tagata, ia tutusa pau tagata uma ia te oe. Aua e te failoga a vaai atu i le tagata e maualuga ona faapea lea, o lau tama lea. Ia manatua, o tina o tina, e tele le leo o tina i totonu o afioaga taitasi na i lo tama. O le ala foi lea na fai ai isi faiga palota, e tausisia isi faapea tatou o ia tama o i ina e maua ai le olataga. E eseese foi la metotia, e maua le olataga o oe lea pe a fai, e lelei ona e faapelepele ma tausi le tina. O le tina i le fanau, tina ia tama, i itu nei. Tama a e le faia le mea lea, ona e vaai lea i ai, e te le toe maua le mea lea. Ioe se i tulou a, tulaga faapea.

Ae ou te fia taua ia itu nei, lau Afioga i le Fofoga Fetalai, o le Ofisa o Faatoaga, le afioga ia Laauli. Se o le farmer, you are the man. E leaga o Laauli o le farmer. O mea e faaleleia o na e silafia ou te le tau fai atu. E leai se vaipanoa o Samoa e te le silafia mea e tatau ona faatino. Ae ou te faafetai o lena ua ia te oe le fuafuaga e faaaoaga ai le tatou fanua lea i Aukilani, aua le makeki ina o Samoa i fafo.

O le lua o se tautalaga, o vaafagota, o le toatele ua fai si taugata o vaa. Ou te manatua aso ia a o i ai le FAO i inei, sa i ai vaa sa omai papalagi i fafo i Sweden o mai fai i inei.

E na o se tuualalo, a maua mai ni papalagi mai i ina e toe taumafaia le atinae lea... o le tele o vaafagota, o le tele foi lena o figota, aemaise o mea tau ia, e faaafaigofie ai ma taugofie ai le taumafa masani a lo tatou Atunuu.

Ona oo mai lea turisi,

FOFOGA FETALAI: Ua ou vaelupeina le saunoaga matagofie a le sui matua le sui mamalu o le Palemene. E talitonu foi o le a faaauaua lau saunoaga pe a toe taliu mai i le tatou malologa, ae faaauau foi le fautuaga faatama matua, aemaise o le tatou Fonotaga ma le tatou Palemene.

E faasilasila atu ua faataatiaese nei Taulumaga o lana Fono Aoaofaitulafono mo lana malologa masani i le taeao. Faafetai.

Na faataatiaese Galuega a le Fono Aoaofaitulafono mo lana malologa masani i le itula 11:00 i le taeao ma toe amatalia i le itula e 11:42 i le taeao.

FOFOGA FETALAI: Ou te faasilasila atu ua toe amatalia nei Taulumaga o le Fono Aoaofaitulafono. Ou te manatu ua maea palega auau le tauteaga ma le taligasua a lo tatou Maota. E talitonu ua maua se faasiligamalosia i le paia o le Palemene e faaauau ai le tatou galuega.

Ou te tapa lau Afioga i le Palemia mo se lafo.

LAFO MO LE TOE TEUTEUINA O ITULA FONOFAITULAFONO

Afioga Hon FIAME NAOMI MATAAFA: Lau Afioga i le Fofoga Fetalai, e talitonu ua maea se faasiligamalosia i le paia o le Maota, i le taliu mai i le tatou malologa.

Lau Afioga e talu ai ona o le faaiuga o le masina nei e faamaea ai le tala o le tupe o lo o faagasolo nei. Ma ua tatou molimauina foi, e le o toe umi ni aso o totoe o le masina. E le gata i lea, ua i ai foi le fuafuaga mo aso malolo e lua (2) ua faatulafonoina mo lena vaiaso, mo le tuiga tele mo le Koviti-19.

O lea ua ou tulai atu ai e faatu le lafo, *E toe teuteu mo le suia o tatou tulafono e faapea. O le a faaauau pea aiaiga o le lafo ua faamaonia e amata mai i le 9:30 i le taeao, seia paia le itula e 6:00 i le afiafi. A o le teuteuga lau Afioga, ina ia tatou faaauau atu i le itula e 7:00 i le afiafi, seia paia le itula e 10:00 i le po. O lea suiga ua faia seia maea le faitauga faatolu o le Tulafono o le Tupe, o lo o talanoaina nei. Ma o lo o i ai foi le Tulafono Toe Teuteu mo le Faiga Palota.*

Faaluaina e le Sui Palemia ma le Minisita o Galuega, Felauaiga ma Atinae Eseese.

Na faamaonia le lafo.

Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe 2021/2022.

FOFOGA FETALAI: E faataatiaese Tualumaga mo le tatou malologa o lo o saunoa se tasi o sui usufono o le Maota aua Sagaga Nu 3. O le avanoa leni ou te tapa ai lau Afioga i le sui mamalu, tulai mai e faaauau lau saunoaga.

Afioga Hon SALA FATA PINATI: Ou te faatalofa atu i lena Itu o le Maota i lau Afioga i le Palemia, le aiga Kapeneta, faapea foi lau Afioga i le Fofoga Fetalai.

E fai se malologa ua oo mai lau tautalaga i le turisi. O lo o faagasolo nei le taimi sa ou avea ai ma Minisita o Turisi. Sa i ai lava le faamoemoe aua le vaega fanua lea i Palauli, o Puleimelei. O se tasi leni o mataaga e ao lava ona silasila i ai le Faigamalo, ona o se tasi lea o mau o lo o faapea, e fai foi o Aikupito o lo o i ai ia mataaga ia o lo o lauiloa ai. A o iinei i Samoa i le Pasefika o lo o tino mai ai le...atonu o i sa...ou te le mailoa pe sa i ai nisi tagata mai nisi Paneta i Samoa nei. Pe ta gafa foi o tatou tagata i tagata mai fafo i isi Paneta.

O le ala la lea o le tuualalo i se vaega tupe e ono faaleleia ai, atoa foi ma isi mataaga tetele o i Samoa nei. Ou te iloaina e anoanoai ia vaega ae o le tupe lava. E pei lava ona molimauina lava pe i ai foi se mau foi lele, ae ua latou faamaumauina mea o tupe, e follow le lead o mea ia e sau ai tupe. O lona uiga ia tulitulimata'i lava po o fea e auala mai ai se tupe e faatino ai lo tatou faamoemoe lea. E le mo tatou nei, a o lumanai o le Atunuu. Aemaise ai foi o le faatupulaia o e fia asiasi mai ma o latou molimauina le matagofie o Samoa.

Ona oo mai lea i mea tau auala, le Minisita o Galuega, Felauaiga ma Atinae Eseese a le Malo. Ae leai se isi na o le toa lea o Olo the man. Olo ua leva ona tatou tau le taua iinei, o le fa (4) le o au Paeaiga. Se malo le tautua, a e fua i i, i le tautua a le tagata i lona itumalo.

O au lava e fai si ou ofo, na e alu atu nei i i, i Saleaula, tiai Saleaula. Uma Saleaula e oo i Salega, a o lea foi ua toe tu mai foi, o le tama o le ata, hah se malo uso. E pei lava ona ou fai atu, se o tatou lava e aiga e tasi. O tatou upu lava ia e felafolafoa lava ma aumai le lagona o le tagata ia, ae matua lava i mea uma, o Samoa lava e tautua. E leai lava se isi o le tautuaina o le Atunuu. E

pei lava ona ou fai atu, o le pule lava lea, o le ala o le pule, o lau galuega, pei ona lauiloa ai foi le tamaloa Amerila lea na tagatavalea. Aua e te fesili i le mea e faia e lou Malo ia te oe. E oo foi i aiga ma nuu, aua e te fesili po o le a le mea e le nuu e fai ia te oe. Ae ia e fesili ifo lava oe ia te oe, po o le a lou sao. O le a le mea e te aoga ai? e te aoga i lou itumalo, e te aoga i lau ekalesia, tautuaina o le aiga. ae muliai lava i le tautuaina o le Malo. Aua o le finagalo o le Atua lea ua tofofi ai i tatou.

Aua ne i galo, aua ne i o tatou maua le ula ona futi lea. E pau lava lea, ia tautuana ma i tatou nei, o le tatou tofi o le tofi mai le Atua. Ia fai i le alofa, ae ia faapalepale lava mea uma i lou faamaoni. Ma ou te talitonu foi i le itu lea, e mai lava i le lotoifale o le tagata o i ina e aumai ai oe i fafo.

A e lelei i le tausiga o lou aiga ma lau fanau, e faapena foi ona aliali mai galuega lelei e te mafaia ona faatino. Aua e le mafai ona e sau fai se lelei i tua, i le Malo ma...ae le o lelei ona e tapena le aiga, lau fanau.

O lau la fautuaga ia i tatou nei, faafetai. E faafetai foi i lau Afioga i le Minisita ia Vasati, talofa, malo le tau. E pei ona ou fai atu, o le Atua e pule, e pule le Atua.

FOFOGA FETALAI: E faamanatu atu le suafa matai o Matamua, leaga o la e faafogafoga mai le afioaga ma le itumalo.

Afioga Hon SALA FATA PINATI: Matamua o i se talofa, ua pau ia te au Matamua, lau Afioga. E leaga o le aso lava o si au pele, o i ina sa matou o atu faatino mea uma e pei ona i ai le tatou mafutaga. E le galo si ou alii i le lelei o si ou alii. Ia aveaveai, aua e pei lava ona ou fai atu, o galuega o galuega mo le Atua, o galuega mo lou nuu, mo tagata.

Lau Afioga ou te toe fia pai mai lava i si au uo o Laauli, Laaulilemalietoa se talofa i le uso. O faatoaga o le pine autu lea o mea uma. O lena ua ia te oe le Esetete, WESTEC. E tele galuega tetele o lo o faapena ona taumafai i ai le WESTEC e faatino. Ma o se fautuaga e tuu atu, a e alofagia se galuega sa tuua e au nei, ua le maea ona faatino, ia aveaveai ia taumafaiga ia. Aua e le i faia mo au galuega nei, sa galue lava ma lou talitonuga. A manuia le Esetete ua manuia le atunuu.

Ona faauma atu ai lea o sau faamatalaga e faapea, si ou itumalo, Tuala e ma Sala. I le paia i le faalagilagi, lo lua toalua (2) Tevaga ma Vaifale, le loaloa o lo tatou nuu, aiga ma aiga. Tulaga o aiga ma aiga, ua fa (4) nei Paeaiga o lo o tusiaao pea ma aumai la outou faaaloalo i lou nei tagata. A o ai lenei tagata ua outou manatu ai, ua outou ave pea le faamua ma outou tusiaao i ai e fai ma sui o lo tatou itumalo. O le a foi sou agavaa, a o le a sou aoga? Ona ou faapea lea, ave le faamua ma le faafetai i le Atua aua e pei lava ona ou taua. E le o tupe e fai ai le faiga palota, a o le malosi o le mana o le Atua e musumusui ai le aufai palota e mafua ai lo tatou tofi. O le feau lea, ma o le mau foi lea ma lou talitonuga lea.

Si ou nuu o Aleisa, talofa. E faigata la matou mafutaga ma Aleisa lau Afioga i le Fofoga Fetalai. Ona o Aleisa ona e fou mai i lo matou itumalo. Ae paga lea, o le tele o le nuu o matai mai i ma i, mai Savaii, o matai mai fea o le atunuu. E aumau i uta i Aleisa ma fai ai a latou faatoaga ma nonofo mau ai.

A taumafai atu le faiga palota, ua i ai lava le itu foi lele, e le usitai tagata, ua fai mai, e leai matou te le i lalo o Tuala ma Sala, Tevaga ma Vaifale, e ese le mea matou te o mai ai.

O le ala lea e avatu ai se manatu a liuliualo o le lupe, e toe taumafai atili pe mafai ona toe suia ia ia vaega o le tulafono e pei ona faataatia, ae tuu i fea. O ala ia o mea, tatou saili o mea manino o mea totoa ma mea aoga mo pulega lelei.

O si o matou aiga, ma au uo, faafetai faafetai e le lava upu e faamatala ai lagona o le faafetai, ma le ootia ma la outou pule ma la outou lagolago mai pea o au. E leai se mea o outou pau ai. E sala foi le tagata e leai se atoatoa, a o le Atua e pei lava na ou fai atu, e faia e le Atua mea silisili pe a o tatou faamaoni e faia lona fingalo.

O lea e faapea mai, ae ou te le i tuua le mea nei, ia outou fealofani.
Soifua ma ia manuia

Na faaalialia le agaga fiafia o le Maota i le patipati o latou aao i le maea ai o le Saunoaga a le sui usufono mo Sagaga 3.

FOFOGA FETALAI: Ua faamalo saunoa, faamalo le tofa i lau Afioga i le tama matua o le Maota lau Afioga Sala aua foi Sagaga Nu 3. Malo le fautua faatoeaina, fautua faatama, e talitonu lava o lea ua lagona ai foi le mafanafana o le Afioga i le Palemia ma afioga i Minisita aua le latou galuega o lenei vaitaimi. O le mea lea faafetai o lea ua e faasoa faamatua toaga aua se fesoasoani mo le agai i luma o le tatou Faigamalo ua i ai nei. O le mea lea malo faafetai, faafetai tanoa malo saunoa. O lea foi ua faafogafoga si ou itumalo, aemaise foi o le lagolagoina o nisi suiga aua foi si afioaga o Aleisa. O lea foi e faafogafoga mai, o lea foi e faafogafoga mai le Malo, atonu e taua foi le fautuaga a le tama matua o le Maota.

O le mea lea, malo faafetai tanoa faafetai saunoa.

O le taimi leni o se tasi o sui mamalu. Ua matau atu ua fou mai le sa o se tasi foi o sui matua o le mataou mai Anoamaa Nu 1, le Afioga ia Alaiasa Moefaaouo Malagaitutogiai Sepulona Moananu.

Ia saunoa maia, o lou avanoa leni.

Afioga ALAIASA MOEFAAUOUO MALAGAITUTOGIAI SEPULONA MOANANU (Anoamaa 1): Ua faamalo faafetai mo le avanoa ua maua mai lau Afioga i le Nofoa lau Afioga i le Fofoga Fetalai, aua foi se sao o leni itumalo, aua le Tala o le tupe ua lipoi nei i lumamea.

O lea foi ua maea atu se faamalositino a le Maota. Ia faafetai i le paia o lou ofisa aua le taliina o le faamoemoe o le tatou Maota aua le faaauuina o le tatou galuega.

Ua maea i le taeao ua sola ona e siitia le atumua i le Atua, aua so tatou matupalapala aua le faafofoga i le Nofaalii Paia a lo tatou Tapaau Sili i le lagi, o le Atua o le faavae i ai lo tatou Malo o Samoa. O le Malo e pele i loto ma agaga.

Ua taoto foi la i taotoga lelei lenei taeao, aua le Fonousu a le Atunuu.

Ua aumai foi lau o lou faamoemoe lau afioga i futia ua sola, ma e le sala ese ai foi le faamoemoe. Ae ou te manatua lou tulai mai le tala e fai i le toga a le teine o le matou nuu. O le pipiimaleelele. E fai mai na fia tofu i le vai o le tama. Ona sui lea o le igoa ua tasiaeafe. O lou tulai mai i lenei taeao ma le faamoemoe, o oe lava o le tasiaeafe aua Samoa ma le Maota o Samoa. O le aiga sa Malietoa ua e pale, ia viia le Atua.

Ua saunoa foi nisi o tootoo i lou taeao o le Talalelei. E moni lava au, o oe na taunuu i ai le Talalelei a Ioane Viliamu, o lea ua ao ai Samoa. Ia faafetai, o la matou tatalo, ia manuia ou faiva, ia maua sau tofa mai le Atua e faafoefoe ai le Maota o Samoa.

Ua ta fia pai lava i le ao o le Tagaloalagi, ae ta te popole i tagutugutu o atumauga o Samoa. Ae a maatui ma maa o le ala e le faigofie leaga e faigata o Samoa, ma ona puatala, o le maa e faafuagalu, e iloa ai le vaeluga o le tai. O le ia foi ia foi e iviivia, e le so ona vavevave i ai se tautai.

O le ala lea ua ou manatu ai, ina ne i fai ma lape o se lauga a Tumua. E ao lava ona matou paia ma vaisausauina ou sa ma ou mamalu. Aua le paia o lenei Maota, o lea e afio mai le afioga i le Palemia, o lou taeao ua tau lou ai, aua le uluai tamaitai ua tulai mai i le tofiga Palemia o Samoa. Ia viia le Atua, e pei lava ona malie, o le tofi ma le valaauina o mea mai le Atua.

E faatalofa atu foi i le paia o le aiga Kapeneta, aemaise le mamalu o le saofaiga mamalu o le la Itu, aua Minisita Lagolago, malo fai o le faiva. O lea ua iu le tatou faiga filifiliga sa i ai. O lea ua outou pale aua le tatou Faigamalo. Ia sagai ane ai o le tai, ia faaosofia foi moe aluaga i le tofa e tau ai taafi aua le tapuaiga mau a Samoa.

O lenei foi Itu o le Malu ma le paia o le tatou Vaega Faaupufai, ia faamalo le onosai. E i ai lava upu foi ia, e fai fai lava lelei tatou. Ia tatou te finau lava i le mea e..aua le ...a o le tatou tiute fai faatasi. Pe Itu o le Malo pe Itu Agai, ae a ese se faamoemoe o se tagata e sau iinei i le Maota e le faasifo aua se manuia o Samoa. Ou te lagona e sese le mea lea e nofo ai, pe a faapea e ese sona faamoemoe. E laualuga lava i so o se tagata Samoa, seu le manu ae tagai i le galu aua le manuia o tatou tagata. Aua se ai mo le tatou tapuaiga.

E faatulou atu i lau Afioaga i le Fofoga Fetalai, o au nei, o lau lauga faataupou lenei faa-Itu Agai. E le i masani lou lauga faa-Itu Agai i aso ia. Sa ou tau alu ia Olo e tau ao mai le lauga, ae faasino mai Leala. Ae ou te vaai atu, i te i ua aumai e Leaga se fautuaga leaga ia te au.

Ae faatulou atu Samoa faafofoga tapuai mai o le paia o Samoa mai ona ao seia oo i ona iu. Mai lava i le tolotolo samasama i le taisamasama seia paia le lualoto o le ana o Fili ma Puletuu, na tauilo ai Malo. E faatulou atu i la outou faafofoga mai. Aua le afio o Faatui ma tootoo, lo outou maopu ma le faleagafulu. Ae a Aiga ma Tama, Tama ma Aiga ma le usoga ia Tumua ma Pule. O sa na ma mamalu na e tiu ai Samoa. So o se Samoa lava i itu e fia o le Kelope ma itu e fia o le lalolagi, o ou mamalu faalupe na ma ou tini na e te tiu ai.

E faatulou foi i le aufaigaluega tofofi a le Atua. I Fatafaitaulaga e fia, o lo o faanonogamanu aua se manuia o Samoa.

Le paia o Faigamalo e lua (2), aua le afio o le Kovana ma le Lutena Kovana aemaise o le Fofoga Fetalai ma Maota e lua (2) i lea itu o lo tatou Atunuu.

Ia liliu mai i lenei Itu, afio lau Afioga i Le Ao mamalu o le Malo. Afio lau Afioga i le Sui o le Fono o Sui Tofia. Lau Afioga i le Palemia ma le Kapeneta, afio lau Afioga i le Fofoga Fetalai ma le mamalu o le Palemene.

E faatalofa atu foi i le Afio i le Faamasino Sili ma le mamalu o le Faamasinoga i Alii ma Tamaitai Faamasino aemaise le loaloa o le mamalu o le aufaigaluega.

Ia o outou sa ma outou faigata, ia e le toe aveia e sa matou tala. O paia e tumau, e oo lava i le faavavau. I ai foi se taimi ou oo i si ou itumalo, ia ae manatua lava i si ou loto le upu o le Tusi Paia, fai mai pe uma lava lenei Nofoaiga e le mafai ona galo ia te au. Fai mai amuia se nuu po o se atunuu o soifua i le Alii ma ona Atua. E fai ona tagata e fai mona tofi. E le o le faamanuiaga lena o lea e tatou te sapi ai ma tatou mataitu i lea aso ma lea aso. O le aao mafola ma le aao alofa o lo tatou Atua, o lea ua taitai mai ai ia le tatou folauga. O lea ua see ai ia lo tatou sa i le malu, ma manuia o le Atua.

Fai mai foi le Upu o le Tusi Paia, e na o le tagata valea e fai ifo i lona loto e leai se Atua. Ioe tatou ne i o tatou valetuulima ia lo tatou tofi na aumai, o le faavae papa lena. O le pogai foi lea o le punavai lea e le fesiligia pe a o tatou talia i o tatou loto ma o tatou faaauau ai pea.

O le tulai mai o le tamaoiga o Samoa, e ese le maaleale e pei ona saunoa nisi ae o tatou siitia i le Atua, e le mafai ona sese ia le alafua e savali ai ia lo tatou atunuu, leaga o Ia e mafai ona faaatoatoa ia mea e le atoa. O Ia e na te faatumu se gaogao o i ai. O Ia na fai mai e na te faia mea e sili atu ma mea e matautia atu na i lo o mea e mafaufauina e tatou. Ia viia le Atua i lenei taeao, Viia le Atua i lenei taeao. E pei lava ona maua i le aso na oulua fesilafai ai, na o tatou feofoofotai, tuli i luma so tatou ai, tuli i luma so tatou ai. O le finagalo foi lea o le Atua, ana maua uma e tatou, ana maua e tatou... semeamanu e leai se... leaga e fai mai le upu, o le upu malie e tea ai le ita. O le leo malu e aveesea ai le le fiafia. Ia o tatou foi e faitau Tusi Paia, ia ae faigata ona o tatou mulimulitai i le finagalo o le Atua.

Ia ua tele ia lauga ua fai e lenei itu, o lea ua manino ua faamalamalama ai nisi vaega o le Tala o le Tupe. Ia ae se i e na o nai mea foi ua ou matauina e

au, tuutuu atu i autafa o le Afioga i le Minisita, ae e le i utufia le vai na momoo i ai le Tuiatua, faafetai i lau Afioga i le Minisita mo le Tala o le Tupe. Faafetai i le Matagaluega, ia o le a se tatou mea e fai pe ana o tatou omai e leai se Tala o le Tupe. Sa tele foi na fai ae o lea ua taatia i luma le Tala o le Tupe ua tuuina mai. O lea ua pule lava outou, fuafuaga faataatitia, talia lupe o maunu, e i ai se taimi fai atu ia se matou tala, leaga o mea ia, e na o mea fuafua o lea e tatou te fuafua e le i faatinoina, ia a tino lelei Viia le Atua. Ia ae a faaletonu, ia o le a fai atu lea o se tala a le sui usufono mai i Anoomaa.

Ioe, e pau lava sina lea e saunoa i totonu o le saunoaga, e pei ua faapoia foi lea fai mai o le tatou Faigamalo ua i ai nei, e pei ua inherit ia le Debt of \$1 billion e le Faigamalo. Ia afai e sao o lea e sao, ae o le Golden Rule lea faa-Accounting, e i ai le side lea o le Debit ma le Credit. Sa tatau la ona i ai i i aua a faauigalua le upu lea, sa tatau ona sau ai but we inherit assets of \$2 billion a, leaga e faapena ia le mea. E ala la ona tupu ia le aitalafu, o la e alu i luga le atinae. O lea ua seei nei i fale nei, taavale, ofisa leaga e alu i luga le aitalafu, ae sosolo atu ai i luga ma le atinae. Ae a alu na o le aitalafu i luga, o lona uiga o lea e i totonu o le polokiki ia le kupe. Ae o lea e tatou te silasila i ai ma vaavaai, o lea lava e o lava faapenei.

Ioe o lea foi e sau ia le tulaga lea e pei ona saunoa ai nisi o le faatotogiina o aitalafu Debt Service Ratio, ia o la e 12% lea e i ai. I lau matau e 20% lea e faaagaga, i fuafuaga tau tupe, lea e matua gafatia, gafatia lou malosi o le tatou atunuu ona totogi. Ae ala ona maua ia le piliona, se i tulou lau Afioga i le Fofoga Fetalai, ia ona o lea e fai ia le atinae. E le i momoe foi lenei itu i le taimi na tulai mai ai. S o tatou galulue e atiae Samoa siitia le tulaga, sau mai i le LDC se i alu i luga i le isi siitaga, o le a? Mitamitaga na o taitai. Aveesea se atunuu mai i le mativa. Ia pau lea o se mea ae o lea ua iloa ua 50% GDP lea ua i ai ia tatou aitalafu. E pau lava lea o le mea e fai, siitia i luga le GDP ina ia mafai ona sau foi nisi aitalafu toe lalaga ai ia lo tatou atinae.

Ia o le isi fuainumera lea e ese le inaina i ai o le aualii ia i aso ua tea, mo le mea lea o le tefesiti ea po o le a ea. Ia o le mea sili lea ua... e manaia le mea a? E lelei, ae o le mea sa i ai, ua galu le Malo, ua galu le Malo. O le tala lea sa aumai. Ia ae vaai, sa ou faapea la i le Tala o le Tupe muamua, o le a le i ai se tefesiti. O le a sau foi lea paleni, a o lea ua amata ai lava, ia faaauau ai pea, e uma ifo lava le 5 tausaga ua sili atu, ia ua tefesiti faasoloatoa ai loa ma le tatou mea. Ia ae malo faafetai. O le mea sili o lea ua outou seei mai, ia e le faigofie lea mea, e faigata le mea, e leai ni faaputugatupe sa fai mai. Aua o tala lava ia. Se ua ai e Tuilaepa ma le vaega tupe a le Malo. Ia a o lea ua manaia ua fai si umi, ua ou fia faalogo lava pe i ai se mea faapea na tupu, ae...

Tofa Hon Olo Fiti Afoa Vaai: Lau Afioga i le Fofoga Fetalai o se mea e fia faamalamalama, e puupuu lava.

FOFOGA FETALAI: Fai ia sina au malologa ae saunoa mai le Minisita.

Tofa Hon Olo Fiti Afoa Vaai: Se malie le sui usufono o lo o saunoa, ne i te i ua e apaapa pea i le mea lena o le tefesite, a o lea o le a ou tali atu i le tou tali masani, o tupe pau e le o se tupe gau.

FOFOGA FETALAI: Ia, atonu o lea ua tali atu le Minisita.

Afioga ALAIASA MOEFAAUOUO MALAGAITUTOGIAI SEPULONA MOANANU: Leitioa a musu si ou uso e ao mai sau lauga faa-Itu Agai leaga i te i ua ou maua ai ana metotia ia sa fai. Ae faafetai. O le inaina o le Maota ma le tauatai i le mea lea, le tatou Tala o le Tupe lea, o le document lea e stipulate ai ma authorise ai government expenditures. Pau lava lea. O le mea foi lena tatou te fono ai, o lea foi o le a tatou fono e tau i le 10 a o la e momoe uma le atunuu, leaga e ese le taua, e faatonutonu ai le faaogaina o tupe a le atunuu.

Tuuaia ia tupe maua aua o le tele o le manaia lena, a o tupe alu, a lea e i i. E le mafai ona fai se mea. A faapea la o lea e tau mai miliona e fia ae le i i, ou te le iloa la po o fea e sau ai le pule lea o le a faitoatasi ai se mea. Leaga o le mea, o le Tulafono e uma nei tatou pasia le Tulafono. O mea uma ia e i i, o mea na tatou te mulimulitai ai. Ae a le i i, aua ne i tatou faaseseina le atunuu, leaga o la e faalogologo mai. Seivagana le Tala o le Tupe o lo o i ai fuafuaga o vaegatupe e faaoga, o mea na tatou te alo i ai. A o le Tala o le Tupe, e leai lava se eseese ma isi mea ia ua uma. Tatou vaavaai i le faaoioiga o le Malo, totogi o le aufaigaluega, service ina o... ina ia lelei le auaunaga, ia o mea taua ia. Ou te le teena lava e au se mea. Pau lava o lea, aua ne i see le ta mai i i le mea lea i totonu i i. Pei lava ona ou fai atu, o le a ou talia lupe o mau aua le alofaiva o le faigamalo i le lipoia o le Tala o le Tupe. Ona i ai lea o se taimi ona toe oo atu lea o se matou tala.

Ia, e le umi se matou faamatalaga lau Afioga. Na pau lava o lea, faafetai mo le faamuamua i a tatou aoga. Se a popoto ma atamamai le atunuu, o le manuia lena. Ia, o lea foi e i ai nai avanoa e fai ai faleaoga. O au e 2 faleaoga o lou itumalo na tatala talu ai nei. E pau lava le mea, e le aoga le fale ae leaga le anofale. Ae ou te fai atu e ese le tele o le impact pe a sui le siosiomaga e manaia le siosiomaga i olaga o so o se tagata. E pei lava o tatou, a fai nei so tatou fale fou, tiga lou fia taotooto ae te le fia alu i fafo. O le mea foi lea e tatau ona faaoga avanoa ia e fesoasoani mai ai ia faaleleia ai tulaga ia e fai ai aoga a le fanau. Ae faafetai o lea e matau atu e i ai le fuafuaga e siitia laitiiti totogi o nai faiaoga. Faamanuia le Atua i le tulai mai o lau Afioga i le Minisita. Leaga o le Matagaluega foi lea sa ma nofonofa ai ma le Afioga i

le Minisita ia Loau, ia talosia ia... ma galulue ai, lea e faasao mai e Loau fai mai ma te le i nofonofu ai. I te i ua alu atu le Minisita nofonofu ai. Leai na ou manao se i nofonofu le Minisita ae fai e le aufaigaluega galuega, ae faamanuia le Atua i le tulai mai o lau Afioga.

Ia, le Minisita o Falemai, tasi la lea mea taua. Pei ona ou fai atu, o le tatou tamaoaiga e maaleale, e poia loa i faamai, ia, oka, e le aoga atoa lava le tatou mea lea. Ae talosia i le alofa o le Atua, o lau Afioga foi o le toe Ulutaia o lenei mea o le polokiki, matou te talitonu o le a fai manuia ou faiva aua le soifua maloloina o le tatou atunuu.

Ia, lau Afioga i le Minisita o Leoleo, na ona ou faamanatu atu lava si mea lea i lau Afioga. I le taimi lenei i le Malo tele o Amerika, ua matua malosi lava le movement lea o le Black Lives Matter, po o le BLM, a o le agenda number one le agenda a le BLM, defund law enforcement defund police. Ia, le tatou Matagaluega ne i oo i ai, leaga o lea ou te vaai atu ua fai lava si malosi o le mea lea na feagai ai ma le tatou atunuu, sa leai ni vaaiga faapea. Ne i te i ua tagi mai ala le faamoemoe, leaga e tutusa lava a le leoleo o le tagata taualoa ma so o se tagata lava, tagata o Samoa. O le mea lea e faufautua atu ai, ia lava le tofa, a savavali mai toeiaina ae feagai ma leoleo ... leai, se i tulou lava. E faapena le vafealoai o Samoa. Ona e vaai lea i ai, e malu lava, e oo i nuu i tua, e le i tau o atu lou ofisa, ua leva lava ona pue mai tua e tama la e i tua le pagota lena e te manao i ai, leaga o le malu o le atunuu. Ia, ia tatou galulue faatasi e fai ma viiga o le Atua.

Ia, maumau le taimi. Sa ou faapea e ave sau talosaga i si ou uso o Olo i nai fesoasoani mo si ou itumalo. A o taimi uma lava e talosaga atu ai le aualii ia, e matamata lava Olo ia i lana laptop, faifai lana telefoni. Lona uiga e maumau le taimi. O le 15 tausaga lea sa i ai i i, e le i i ai lava se mea a si ou uso na faia. Ae se i ta fetau i le ta itumalo i Salega ona monomono atu lea o lau lisi i lau Afioga, ioe. O la e faafofoga mai si ou itumalo, toe lava o nai mea laiti. Ae faamanuia le Atua i lou tulai mai.

Ia, se i ou oo i si ou itumalo. Ia, le faiga palota na uma nei, se o se faiga palota matautia le taugata toe faigata, ioe, toe mataga. Ioe. Ia, o le mea ou te popole ai, o tatou nei... o lea foi ua toe aumai le isi Tulafono lea e teuteu mai. O tatou lava nei e faia Tulafono ae taulamua lava le soli o le Tulafono. Ia o le afu la lea o le o i tai i i ma faaleaoga uma ai lava ma... ona o le tago i le mea e le tatau ona tago i ai. Ia ae tatou faiga palota, e leai se mea o le a ou onosai ai o lea lava ou te malo and still, ioe. Ou te momoli atu foi le faamalo i si ou itumalo i le logosaia foi o le faamoemoe, o lea ua tau lau o le faamoemoe. Na ou alu atu lava i le vaitaimi lea e le i oo i le aso Faraile, e le faalupea lava au o se faipule. Fai mai e le o oe o se faipule e le i faatautoina oe. Ou fai atu, ia ua lelei ou te inu lava i ai. Aua tou te o atu i mea ia ou te alu i ai leaga o Alaiasa o le vaa sii tasi o Atua, a alu lava e oti ai, oti ai. Ioe. Nofonofu pea outou. Ae ou alu atu nei la i le Aso Toonai, oi, ua matua fiafia, ua praise the Lord o lea o le a e alu i totonu e ave le finagalo o le tatou

itumalo. Ia faafetai i le Atua ua tea na fatia, ua tatou feofoofotai. Ae sa tau safea lava le maaveave le fua fai mai ua leva ona faatauto au. Ae lau Afioga i le Fofoga Fetalai, e le i i ai se taimi na ta feiloai ai pe ta te talanoa i se telefoni, ioe. E leai ma se taimi. Ae ou te faamagalo i le au faitatala lenei e feoai ma fai mai ua ou alu i o i le pito le la. Ae leai, se o le tootoo o Lufilufi e na te tausia le atunuu. O le tofa a aiga e le luma tua, luma tua, e le o ula foi lea o le ulavai e maua i tua ia matou e vave atu le alu i tua i lo le alu i luma. Ioe. E le faapena le tou sui usufono. O le tou sui usufono, ia, e go to luma lava, e tutu lava i le mea e faamaoni ma le mea e tatau ona fai.

Ia, le paia o le tatou itumalo aua le Tumua ia Lufilufi, aemaise foi ona fuaiala, aua le afio o le Tuiatua o le Tapaau Faasisina, tafai o le Tuiatua, susu foi le Toaono ma le Saofaiga ma le mamalu i le Tumua. Tainane le afioaga o Aiga, Aiga o Tupu, Aiga Sa Fenunuivao ma le Aiga Sa Alaiasa, le Matua ia Iuli ma Moeono ma le tofi faasolo i le aai o le Tupu ma le tagata o le Tuiatua. O paia na o le tatou itumalo. Ia leaga o lea ua i ai ma si ou nuu fou lea ua faaopoopo mai, e faigata Gafa ma Alosina, o le Too o le Fua ia Molioo ma le mamalu o le Ailaoa ma si ou nuu o Faleapuna. O lea o le a tatou galulue i lenei 5 tausaga. Ioe. Tatou o e tuufaatasi o tatou loto ma o tatou agaga, tatou o e fai o tatou itumalo ia lelei. O le tiute lava lea o le sui usufono, agai lava ia i lona itumalo, agai uma le isi 50 ma ona tupu i o latou itumalo, manuia Samoa. E mautinoa lava e manuia Samoa. Na pau lava lea, toe tolopo laitiiti le tatou Komiti lea na fai e fuafua i le miliona, o lea o le a toe faataape laitiiti se i maua se tonu mautu o lea ua saunoa lou uso ia Laauli, e i ai se taimi tau lau o le faamoemoe.

Ia, faamanuia le Atua i lau Afioga i le Palemia lau Afioga i le Sao Faapito, ia maua lau tofa faale-Atua. Ia ou te tatalo lava i le po ma le ao ia i ai le faamalologa, ua ou vaai atu na o lou taletale lava i te i ua e gasegase vave e le i taitai ou tiute ma ou faiva, ia maua sou laulelei i le tino ae faasilisili i le agaga.

Ia, manuia lona talaga atoa, manuia i le alofa o le Atua. E faapai atu foi lau faafetai i le afaigaluega a le Atua i si ou itumalo, e le gata ia Samoa a o si ou itumalo, o lo o latou tatalo mo le manuia o le itumalo. E le mafai ona galo ia te au le matou Kolisi Faafaifeau i Piula, leaga o i o le isi punaoa lea o lo o aotauina ai alo ma fanau aua le galuega paia a le Atua. Faamalo faafetai i lau Afioga i le Pule, aemaise le mamalu o le vasega o faiaoga i le tamaitai ma le paia o le Kolisi.

Faafetai i Komiti o Tina i aualuma ma... a o lea e fai lava a tatou polokalame ina ia taofia le sauaina o tina. E le o mapu le polokalame, faafetai atu foi i le Ofisa lea o lo o fai lava le faamoemoe lea i tua i si o matou itumalo. Ia, o taulelea ma i latou uma i totonu o le malosia o le tatou itumalo, ia i ai le agalelei ma faamanuiaga a le Atua. Ia, maua so outou malosia e tautua ai le sui usufono ma le tatou itumalo.

Ia o le matou tala o le a foi. O le a foi sa outou faafofoga, o le a se faafofoga a lau Afioga i le Fofoga Fetalai, pe o se mea ua taulaulu i lau faafofogaaga, ou te faamalulu atu. Leaga e taeao o le talalelei oe, ae aso atoa au. Na o au lava le aso atoa i paia o Samoa. Ioe. E le o ni tala aveane ai mea ia ou te fai atu ai lau Afioga. Ae ia manuia tele le Fonousu a Samoa, manuia le faafofoga mai a le paia o le atunuu. Ia faamanuia le Atua, i le Suafa o Iesu, Amene ma Amene.

Na faaalua le agaga fiafia o le Maota i le patipati o latou aao i le maea ai o le Saunoaga a le sui usufono mo Anoamaa 1.

FOFOGA FETALAI: Ia, ua faamalo saunoa, ua faamalo foi tanoa i lau Afioga i le sui usufono mamalu, o se tasi foi o sui usufono matua o le Maota. Le sui usufono mamalu mo Anoamaa 1 malo saunoa faatamalii, malo foi le sua faatupu ma faatamalii i lenei aso. Ou te talitonu lava o lea lava e te sua lava ma momoli mai fautuaga taua i le faigamalo. O le mea lea, faafetai tele lava. Malo foi le manatu mai ma aumai le lagolago i lea itu aua lava le tauatiaeina o le atunuu ma sona manuia. Ia, ou te talitonu lava e tusa lava oulua ma Olo, sa e tulai mai foi i Savaii i Salega, a o lea foi ua e toe tulai mai i Anoamaa, o i ina e fua i ai le tagata e lelei le tautua i le itumalo.

O le mea lea, malo le onosai. O a foi futia i le faiga palota, ia malo lototele. Ae talitonu o lea ua i ai lou sao aua foi le Afioga i le Minisita o Tupe aemaise foi le faigamalo e feasosoani aua le tamaoaiga o le tatou atunuu. O le mea lea, malo le tanoa, faafetai saunoa.

Ia, o le avanoa lenei o se tasi o sui usufono mamalu o le Maota.

Ia, ua matau atu o lea ua tulai mai le sui usufono mo Faleata 3, ia o le Tofa ia Lealailepule Rimoni Aiafi. Ia, o lou avanoa lea e saunoa ai. Ma le faaloalo.

Tofa LEALAILEPULE RIMONI AIAFI (Faleata 3): Ia, faafetai i lau Afioga mo le avanoa, ou te talitonu o se taimi talafeaga lea, o lea e manaia le sipili, o lea e neutral lava le saunoaga a si uso vaeane le tootoo o Lufilufi.

Lau Afioga i le Fofoga Fetalai, o lea ua faalele manulagi ua faalelefulu aliiseu i malae o tagatia a Samoa. O lea foi a tatala taula a tamasa o aiga ma vevelele tupua a ilamutu se i lologo tiasa o alii, aua o lea ua pau le tupua ma le malae o Tiafau nei, o le malae o Samoa. Aua o lele ua ee i vaatapu, nofoia le vaaloa e lau Afioga i le Fofoga Fetalai, tulou lava.

O lea foi ua faalepa le fua o tautai alii i sui usufono mamalu o le Palemene, tulou lava.

O le ee lava lea i le afio tauee o Le Afioga i Le Ao Mamalu o le Malo, le Afioga i le Tuiaana ma lau Masiofo, afio lau Afioga i le Sui Ao lau Afioga Le Mamea Ropati ma lau Masiofo, afio lau Afioga i le Faamasinoga Sili, lau

Afioga i le Peresetene o le Faamasinoga o Fanua ma Suafa, faapea le afifio i alii ma tamaitai faamasino ma le vasega o faamasinoga.

Afio lau Afioga i le Palemia lau Afioga Fiame Naomi, lau Afioga i le Sui Palemia lau Afioga Tuala Ponifasio, afifio sui usufono mamalu o le Kapeneta, afifio Minisita Lagolago ma lena talaga atoa.

Afio foi lau Afioga i le Taitai o le Itu Faatauagai lau Susuga Tuilaepa Dr. Sailele Malielegaoi, lau Tofa Lauofo Fonotoe o le Sui Taitai, le mamalu o sui usufono o le Itu Faatauagai.

O le paia lava lea i le afifio o Tama ma Aiga, Aiga ma Tama, le mamalu ia Pule ma Tumua, Ituau ma Alataua, Aiga i le Tai ma le Vaa o Fonoti.

Tainane foi le paia i le afio o le Faleagafulu i le paia ia Sua ma le Vaifanua, Fofu ma Aitulagi, Saole ma Saleaamua ma le Launiu na Saelua. Tulou le susu o le Laau na Amotasi, le afifio i Faatui ma le mamalu o le Auvaa o Tootoo ma Upu ia te oe le Manuatele. Tulou lava.

E ofo alofa atu ma faatalofa i le paia maualuga o le aufaigaluega a le Atua o lo o faanonomanu aua se filemu ma se manuia o Samoa. Tulou lava.

E ofo alofa atu foi i Ofisa Sili o Pulega o Matagaluga ma tagata faigaluega uma a le Malo aemaise faalapotopotoga ma kamupani o outou o lo o tua i ai le Malo i la outou auaunaga, ma lona tamaoaiga. Tulou lava. O lea sasama le toalafanau i le nanamu o le ola, o lea foi ua faafati malu peau lalaga o le taifanae, o lea foi o le a ou sapi i taaga ma valuvalu aa o le fau se i aumai se tala ou te gagana ai i le Maota lenei, ae o le a fana sao le malama i se faamatalaga se i folasia se manatu o le itumalo o Faleata 3 i le Tala o le Tupe ua folasia nei i lumamea.

Ou te faatalofa faapitoa foi i sui usufono mamalu uma ua ulufale mai i le Palemene o Samoa i lona uluai taimi. Faamalo le finau, faamalo le lototetele. E faamalulu atu ua le maua se avanoa e faalogologo ai ma tapuaia le tou lauga faataupou ae ia manuia le tou tulai mai. O le Paeaiga lenei ua tupu faalua le mea lenei lau Afioga, nai sui usufono matutua, le tama ia Faasootauloa, o lea ua toe afio mai le Afioga ia Tea. O lota fiafia ia i tama matutua ua toe fai mai i le Maota. Malo Tea.

Ou te faatalofa faapitoa foi i sui usufono mamalu o lenei Vaega Faaupufai ia i latou ua le mafai ona omai i totonu o le tatou usugafono i lenei aso. Faamalo le tou lototetele, faamalo le tou onosai. Ia tuu laia i le Atua le tou faamoemoe. E le galo outou i le tatou savaliga.

Ou te faatulou foi ma faatalofa i si ou nuu o Vaitele, i le afio o le tama a le fale ia Mataia, afio Galumalemana, Tupuola, alaalatai Toi, Pula ma le paia o le tatou afioaga i Vaitele. Tulou lava. Malo le tapuai mai. Faafetai.

E faatalofa foi i le paia o Samoa ua avea Vaitele ma outou afioaga tatou te nonofo faatasi ai, faamalo le tapuai i le paia i ona tulaga faalupe o le a ou le tautala i ai, o paia ma sa e le avea o Samoa. E faatalofa atu i le tou paia, aemaise lava i le aufaigaluega paia a le Atua.

Lau Afioga i le Fofoga Fetalai ma lena itu, faamalo. O alofa na, o alofa nei. Ma e tasi le naunautaiga tatou te oo mai ai i le Maota o Samoa, ia filemu ma ola fiafia tagata o Samoa. I lou talitonuga, ou te tautala pea i le mea lenei ae le mafai ona tuua. O le temokarasi a Samoa e ese mai temokarasi uma a le lalolagi. O le temokarasi a le Samoa, e tafatolu. E faavae i le Atua ae faamalumu lana aganuu. O lea ua uma ona tamau i totonu o la ta Faavae. O lona uiga e faavae i le alofa ae ufiufi i le va fealoai ma le faaaloalo. E ese mai ai le temokarasi a Samoa mai atunuu uma o le lalolagi.

O atunuu lata mai, e amata atu lava i Fiti, Niu Sila ua le toe i ai se talitonuga faale-lotu, ua leai se Atua i lo latou Palemene, ua le toe faia ni lotu e amata ai. Ua pule le tagata i le atua e tapuai ai. Ae a Samoa, o lea ua tamau i totonu o lona Faavae. E tasi le Atua o Samoa o le Tolu Tasi Paia, ma lana aganuu e ufiufi ai mea uma.

A ou vaavaai i le Maota lenei, o outou o faiupu, tausii aiga, tausiiuu. Ia te au lava ia, ina ua tuu i totonu o le Faavae lo ta aganuu, ua atoa ai le ta temokarasi e le toe fesiligia. Aua e fesili taeao i le aso, o ai na i ai. O lea foi ni lavasiga na tatou feoai ai nei, ina ua tatou oo mai iinei i le Palemene, sa mulimulitai lava le Aao alofa o le Atua, ma lana aganuu i mea uma. O lea ua iu i le filemu, ua tatou o mai iinei e saili se tatou ai mo taeao.

Lau Afioga i le Fofoga Fetalai, o a futia ua sola, tatou te talanoa pea, tatou te manatua o Samoa le isi atunuu e faamanuiaina i le mea lea, na tupu ai muamua. E tatou te le fia talanoa i ai.

Ae lau Afioga i le Fofoga Fetalai, tatou te manatua ma faaoga, po o a lesonea, le a le aoga o mea ua tutupu mai i le savaliga a Samoa. E leaga e aoga, e fesili taeao i le aso, e fesili taeao i le aso. Lau afioga, e le mafai le mafai ona aveesea lou talitonuga ua oia le Faavae o Samoa. A oia loa le faavae o Samoa tatou te fiu e toe faasagasatonu. A oia faavae o aiga e faapena, a oia faavae o le nuu, e faapena foi. Ia tatou tatalo, tatalo aua ne i toe tulai mai nei mea.

O le Maota o Samoa o le laualuga lea o sailigamalo a o tatou tuua. O le fua o le tagavai e lele pea ma agiagia i lumafale, o le faailoga o le saolotoga. A o lona Faavae o le taiala lena e taiala ai taua seia oo i amuli. A ta savavali ai e tumau lava lo tatou filemu ma lo tatou nonofo faatasi.

O nei fefinuaiga na o tatou faia, o lea ua faalava le amoa. E tatou te le tusitusilima po o ai e sao ao ai e sese. Aua e sao ma tonu le tagata i lona talitonuga ma lona taofi. Ma tatou te taofi tonu lava i le mea tatou te talitonu i ai. O lou talitonuga o lea ua tuu i le atunuu, e faamasino mai i latou. Ae a le silafaga a le Atua, e le pogisa i mea faapenei. A o le tatou tatalo, alo i luma le sa o Samoa, ua taliga lo tatou Atunuu.

E faafetai o lea ua tatou Fonousu, ua atoa, e ui ina i ai ni sui ua le mafai ona oo mai, a o lea ua fono Samoa. Ua tali tatalo a le atunuu, o tatou, e le mafai ona taatia pe natia ni o matou manatu lau Afioga. Ae talu ai o lea ua e saunoa,

tatou tuu faapea, tuu faapea, o lo o silasila faafofoga mai, e silafia e le Atua, ma o lo o silafia e Samoa mea uma.

Ona ou oo mai lea lau Afioga i le tatou Tala o le tupe. E sefulu (10) tausaga o ou i le Itu Agai, ou te le teea lava se Tala o le tupe, ou te le teea. Pe ou te i ai foi i le Itu a le Malo i le lima (5) tausaga talu ai. A faalogo atu lava Lealailepule i le mea e.. i lona talitonuga, e ave le fautuaga ma le tuualalo, e ave lava.

Aisea? O lau tala lea e fai masani i le Tala o le Tupe. E faafetai, o lea tatou te omai e faasoa le tamaoiga o Samoa. Faafetai. Ma e le tele sou tautala i ai, aua o le Tala o le tupe, o le tala o le tupe na tele lava ina faatino e lenei itu.

E talitonu o lona ua silafia e le Minisita. O lea e faataatia Faiga Faavae o le tatou Malo. E leai se mea o gase leai se mea o tupu. E pei o le taavale okomeki foi lea, e na ona oso lava i totonu oomi le vae alu i le atoa. Aisea? O lo o taatia Faiga Faavae na sau ai, e puipui ai lo ta tamaoiga.

Ina ua outou afifio atu i totonu, na i ai le mea e tau o le 20/40 vision, ua oo i le 40 tausaga le vaai a lo tatou Malo. E le gata i le 40 tausaga ae i ai ma mea tai lima (5) tausaga o le STS. E faataatia le tamaoiga o Samoa i le lima (5) tausaga ma lea lima (5) tausaga. Ua uma ona faataatia.

O lau fautuaga a outou mulimulitai i ai, e leai se mea e popole ai. Aua a fesili mai Samoa ia Leala. E i ai se mea na popole ai Samoa, ma lou itumalo e ono gau lo tatou Atunuu. O le vave ia o lau tali, e leai se mea faapena. Aisea? A tatou tilotilo i ai i le tamaoiga o Samoa mai le 20 tausaga talu ai. O le 2000, e na o le \$700 miliona le tamaoiga o Samoa. Oo mai i le 2010. E \$1.8 piliona, oo mai i le 2019, ua \$2.2 piliona. E te le tau alu la tau i se isi, o Samoa o lo o siisii i luga lona tamaoiga. E tau e fuainumera ia e le pepelo lau Afioga. O fuainumera nei e mai i le World Bank, o le faletupe o le lalolagi. E te alu lava i luga o le Website, oso mai ai. O le tulaga lona lau Afioga, e le o se tala avane ai.

O fuafuaga tuutumamao. O lea ua taua e le Afioga i le sui mamalu mai Lufilufi le tulaga o le tatou deficit, ia o lona. E toeitiiti aso atoa o tau faamatala mea e tau o le tefisiti, ae faafetai i si ou uso o Olo. O lea la tatou te iloa, na matua malamalama lava, o lea la ua toe faamaonia ai, o le tupe pau, e le o le tupe gau.

Aua ou te iloa le mea malie lau Afioga i le Fofoga Fetalai. O le tefisiti lea na i ai i le Tala o le tupe na tea nei, e uma ane, ua 1% le growth. O lona uiga e uma ae le Tala o le tupe lea faatoa uma atu nei, e le o gau, e leai se tupe pau. Ae o la e i ai tupe faasili e 1%.

O le mea lea na taua e lau Afioga i le Minisita lea e taua e faapea, leaga e pei e ogaoga le saunoaga a lau Afioga i le Minisita, ae aoga pea ona...Le mea lea faapea ua outou amoa se aitalafu tele e piliona. Faamalulu atu, o lea e faapea mai ua 50% le ratio le death ratio lea i le GDP ma le aitalafu. Lau

Afioga e na o le 48 lea e i ai i faamaumauga. Ua ala ona 48, ona ua pau le tupe maua.

E leai se atunuu o le lalolagi lenei lau Afioga, e le o aafia lona tamaoiga ma pau le tupe maua, ona o faamai ma tulaga o i ai le lalolagi.

O aitalafu foi ia e tulai mai, o isi aitalafu e tai 30 tausaga. E togitogi e le Malo i aiaiga faapitoa mo i tatou. O lea ua manino i le Tala o le tupe, e \$72 miliona lea ua tuuese mo le tologiina o aitalafu. E le taitai ona oo i le mea lea e i ai tatou o le first hole lea e i ai tatou i le 20%. E ese le matagofie o le sui lea mai Salafai o Fepuleai lea na ou faalogo mai i ai.

E tau atu le loan e piliona ae fai mai le loomatua winty winty. E sao, e sao. O aitalafu e te fua i lou malosiaga e te totogi ai. E faapefea ona atinae Samoa. O le mea lea, aua tatou te popole. Aua tatou te popole i tulaga ia, ma o le fautuaga lena ua tuu atu i lau afioaga.

Aua o le Tala o le tupe lea na fuafua e le Malo HRPP, e ova i le piliona le tala o le tupe. Ua ta fiafia lava o lea faatoa oo le Tala o le tupe a Samoa i le piliona.

Apeitai ane, o lena ua le fai atu, o lena ua i le tulaga ua i ai. E le tele foi se manatu i ai, aua e i ai foi le komiti faaletupe na avatu e vailiili. Ae ui i lea o le a toe maua se avanoa i le taimi e auiliili ai le Tala o le Tupe.

O lau lava tala i lou itumalo ma tagata na fai mai ia te au i le miliona. Na ou fai i ai, e leai se mea faapena e tupu. E leai se mea e faapena e tupu e tufa ni miliona. O lea la ua talitonu i ai. O poloketi ia e fai, lau Afioga e le se mea fou ua leva ona faatino mai e le Malo poloketi faaauau mai e lea itumalo ma lea itumalo. E malamalama lelei foi sui matutua o lena Itu.

E manatua lava le poloketi mulimuli lea na tatala nei i i, i Satapuala ma Faleata. O nuu ia e lua, o lea na matua tutulu ai le toeaina o Vaili. Faafetai i le Malo o lea faatoa fai le auala ta ma le vai. A tuufaatasi ia atinae ia e lua (2) o Faleatiu ma Satapuala, e \$7 miliona le tau. A fai auala galue a fai mea uma o tupe na. O le mea lena e tau o atinae e atinae ai ia nuu ma itumalo.

Susuga Hon Laauli Leuatea Polataivao Fosi: Lau Afioga i le Fofoga Fetalai, o le mea e fia faamalamalama.

FOFOGA FETALAI: Onosai mai le sui mamalu, vaelupe lau saunoaga. Se i saunoa mai lau Afioga i le Minisita.

Susuga Hon Laauli Leuatea Polataivao Fosi: Faafetai i le saunoaga a le sui mamalu. E leai foi se atugaluga e faapea e fia faalavelave. O le itumalo o Lealailapule matou te le i o i ai, matou te le i folafolaina foi i ai se miliona. O itumalo matou te le i o i ai, o itumalo foi na e leai se miliona. E faigofie lava le tali. O lea e faafofoga mai le Minisita o Tupe, ma le Minisita o Tina ma Tamaitai, just take it easy that way. O ai latou uma ia e faitio mai i le miliona, don't waste your time, ua lava a itumalo na tatou o i ai ma latou

talisapaia. O latou lava nei, o folafolaga lava lea, e le tupu, e le tupu, tupu. Tatou te le i o i Vaitele, aua le maumaua le taimi o la e faafofoga mai le itumalo. O lau tala lea e faapuupu ai lea mataupu lau afioga.

FOFOGA FETALI: Tulai le sui mamalu faaauau le saunoaga.

Tofa LEALAILEPULE RIMONI AIAFI: Faafetai. O le mea tonu lava lea lau Afioga. O le mea la e oo i ai, faafetai i si o matou itumalo, matou te le o disappointed, faafetai i lau Afioga, aua e fetau lava. I am a million dollar man. If you need money, I will give you some money.

Susuga Hon Laauli Leuatea Polataivao Fosi: Si mea laititi lava lea. O lea la ua faamautinoa i le taeao lenei, Leala is a middle man. Ma le agaga faaaloalo.

FOFOGA FETALAI: Tulai mai le sui mamalu e faaauau le saunoaga.

Tofa LEALAILEPULE RIMONI AIAFI: A tatou talanoa loa i le tupe e tufa. E tau ina faamanatu mo le silafia e le paia o le tatou Atunuu. O le mea lea o le penisione, o lea ua siitia ua oo i le \$30 miliona i le tausaga. O a tatou fanau, na amata e le HRPP. E oo foi ia i tatou, na uma lava ona totogi e tatou matua o tatou pili. Ae a le taimi lenei. O au na ou tetee i le mea lenei, a aveifo i luga Hansard o au na ou tetee i le mea lenei o le faaaoga fua o fanau. E le o se isi tulaga, ae pei e fua lou loto i le vaai atu i le vaivai o ta matua sa i ai, ae faaaoga lava i la tupe. O lea la ua ou ola mai au, o lena. E alu i le aoga e leai se rubber. O le uiga o lau tala, e le faapea ou te tetee i fuafuaga a le Malo, o le uiga o lau tala, o lea ua vaai i ai le atunuu, faaaoga fua i le aoga. O le tupe lea e faaalu i le faaaoga fua o sa ta fanau, lea sa \$18 miliona lea ua \$17 miliona, a tuu i ai ma le \$30+ miliona lea e tausai ai o tatou matua faifaipea. E ova i le \$50 miliona, lea e tufa e le Malo i tausaga uma lava. E le gata i lau penisione lea la ua sii i le \$200 i le masina. E te alu fua i vaa, e te nofo fua i le falemai, e tala fua au fualaa, e te tausami fua e faaono ona e tausami i le aso. A fua la i si ou tama lea e i ai nei ua 85 tausaga, e 20 tausaga o maua fua lana tupe lea, 25, oka oka se na tupe. O le tulaga lena, na ona faamanatu i lau Afioga.

Lau Afioga i le Tamaitai Minisita, ia manuia lou tulai mai. E le faigofie e le faigofie. Ae pei ona talanoa atu, e avatu le tuualalo. Aua e te popole, atiae le atunuu. Na tatou omai, omai le HRPP i totonu, ou te manatua o ota laititi saunoa Tofilau, ositaulaga, ositaulaga. E leai se tupe mativa o Samoa, tu i le laina aua le faatau o meaai. O tatou, alu i le aoga, tasi le pea seevae foi mai fufulu taofi, faatoa toe see taeao e sosoo ai e alu i le aoga. O le olaga lena ne i te i ua galo ia tatou. A ta alu atu i le faleoloa, e tutu i le faleoloa ma e tilotilo i totonu, e te fia ai e moomoo i ai lou loto ae leai sau tupe, leai sau tupe sa

tau faasao. Ua ola ae fanau, e faigata, e talosia ae latou manatua nei mea. E le faigofie, e le faigofie le taumafaiga maiga o si o tatou atunuu. Ne i galo ia te i tatou, ne i galo ia i tatou. O le aga foi lea a lenei Vaega Faaupufai faapea e faavevesi le a, faaleaga le a, leai. E faapefea ona tatou faia ni tulaga faapena i le Malo na tatou i ai i le 40 tausaga ma atiae mai?

Ona ou oo mai lea lau Afioga i le mea lea ua faateia ai nei tatou i le mea lea o le Daylight Savings. Lau Afioga i le Minisita, Malo. Faumuina, e i ai lava taimi e fesopoai ai ta... ae le iloa e le toatele lea ua leva ona ta mafuta. A tupu ou faalavelave e te sau, a tupu o'u faalavelave ou te alu atu. Ou te manatua le taimi muamua sa ou sau ai i le Palemene, lenei, o si ou aiga lava ma si ou toalua sa tu malosi. Pau lava lau fautuaga ia te oe le uso, faale-uso ia te oe, taatia na mea o facebook ma le ita ai fua o tagata ia te oe ma taua. Ua e Minisita, tuu au facebook e fai e tamaiti ia i tua. Fai atu ai foi. O lau fautuaga faaleuso ia te oe, a o le mea lea lau Afioga, afai o le finagalo lea o le Malo. Pau lava lau tuualalo, e le mafai, le mafai ona tupu le mea lea tou te finagalo e fai i le masina fou. Ne i te i ua sasi outou. Leai e le mafai ona faatino, o le mea lenei e 10 i le 12 masina sa taumafai mai ai. Leaga e secrete digital. Ou te le tau fai atu lau Afioga. Lea atonu e saunoa atu le Afioga ia Onesemo. Se malie ua galo ia te au lou suafa matai Pou. Toelupe, ia ou te talitonu e sili le tou fetuunai ma Toelupe, e le faigofie le mea lenei, e le mafai ona tupu i le taimi lea tou te finagalo e tupu ai. E le mafai, e aafia uma ai... O lenei foi e silafia e Olo, o le tamaloa e tele i le faiga o... e malamalama i mea ia i pou ia i luga ma le monitoring system ma le financial ma mea uma, e le mafai ona tupu i le taimi lenei, e le mafai. Ia a o le mea foi, e tataua ona consult muamua suiga tetele faapenei pei foi ona sui e le Malo. Aemaise le Chamber e aumai se latou finagalo ma le tuualalo leaga e le faigofie mea nei, e pei lava ona ou talanoa atu, e i ai lava faiga faavae ia ia tatou mulimulitaia, e faigata foi ona fesiligia outou. E oo i le mea lea o le 20% lea mai SOEs, ou te le iloa pe faapefea ona tupu lenei mea, pe na consult pe na talatalanoa ma SOEs nei. O tatou, e tasi lava le afa fia selau miliona e moomia. O ai la e toe tua i ai? E toe tua mai i le Malo. E toe tua mai i le Malo. Ua tele tele lenei tupe. E leai lava se isi o tatou e le mananao i lenei tupe, e mananao uma lava i ai. Ae tatou te fuafua, tatou te fuafua i mea talafeagai.

Lau Afioga i le Minisita o Leoleo, ia ou te iloa ua uma atu fautuaga, e le toe oo foi ia te oe le uso. Ou te iloa ua 10 ta faalavelave i lenei tausaga atoa, ma e a ta mafuta ta te le talanoa lava i nei mea o polokiki, e sa. Faatoa ta talanoa lava i le polokiki i inei. E i ai le tala na pisa, fai le matou fono ae pisa e faapea, na faatonu e le Minisita o Leoleo e loka le Taitai o le Itu Agai, le matou taitai. Faatoa lagona lava lea, ou fai atu lau tala, e le mafai ona tupu, le mafai ona tupu, e le faia e le tama, vaeane le mea lenei. Pau lava lea o le taimi ae fetau ma le ta faalavelave i Lalovaea. Lena e te silafia, na ta nonofo

faatasi, pau lea o le taimi ua ou musumususu atu ai ia te oe, e sao ea lea mea e....

FOFOGA FETALAI: Onosai mai se i tulai mai le Minisita o Leoleo leaga o lea ua agia le saunoaga a o faafogafoga le atunuu.
Saunoa lau Afioga i le Minisita.

Afioga Hon Faualo Jeffrey Harry Schuster (Minisita o Leoleo ma Falepuipui): Faafetai lava i lau Afioga i le Fofoga Fetalai. Ia se i malolo foi si ou uso nei. O le Tulafono lava a le Maota lau Afioga i le Fofoga Fetalai... o se tuuaiga foi lea po o se tala ia faamaonia, aua o le mea muamua lava, e leai se faatonuga faapea na ou faia, e pule lava leoleo i o latou tiute, o la e i lalo o le Tulafono. Lau Afioga, o la e manino le Tulafono, e leai ma se malosiaga o i lalo o le Minisita o Leoleo e poloaia ai Leoleo e molia ma taofia se tagata, na o le leoleo lava e i ai le malosiaga lea.
Faafetai.

FOFOGA FETALAI: Ia, masalo o lea ua faafogafoga mai le sui usufono mamalu, ae ao foi ona... ia... se i uma atu se tala a le Nofoa ona fauma mai lea. O lea lava e tau piipiiama atu aua le faafogafoga mai a le atunuu. O lea lava ua faafogafoga le atunuu o lea ua saunoa malamalama le Minisita o Leoleo, e leai e le faapena e le tutupu fua ni mea faapena. O tatou lava, e oo lava le faatonuga i le mea e oo i ai le faatonuga faapulega, a o le faatinoga o galuega, ia e le oo i ai. O lea ua saunoa manino le Minisita. Ia ou te talitonu ua faamalieina lou finagalo.

Tofa LEALAILEPULE RIMONI AIAFI: Ia faafetai. O le mea lena sa tau oo i ai sau faamatalaga e leai se mea faapea na tupu.

FOFOGA FETALAI: Ia se i tuu atu le avanoa i le Afioga i le Palemia.

Afioga Hon Fiamē Naomi Mataafa: O le mea e fia faasao. Ua faalogologo lava ma le totoa i le saunoa mai o sui usufono mamalu, tau mai le la aiga ma le Afioga i le Minisita o Leoleo. Ia tailo i se finagalo o lau Afioga, e le logolelei lea mea, e le o se mea lenei a le lua aiga, ma e le faia foi ni tonu a le Malo i ni faia faaleaiga. E matua le lelei lava lena upu e fai i totonu o le Maota lenei ma faafogafoga mai i ai le atunuu. Ma o le mea lena o lea e tupu ai faalavelave, ua manatu lava nisi o se mea a se latou aiga. E leai, o mea lenei, o mea a le Malo, e fuafua i luga o le Tulafono.

FOFOGA FETALAI: Ia, ou te iloa o lea ua faafogafoga mai le sui usufono mamalu i le fautuaga a le Palemia, ae talu ai ua oo foi i le taimi o le tatou malologa.

O le mea lea, ou te vaelupeina le saunoaga. Le sui usufono mamalu, e faaauau lau saunoaga pe a tatou toe ae mai le tatou malologa. O le mea lea, o lea ua tapena e le tatou Ofisa le tatou taumafataga o le aoauli, tatou te talisua faatasi.

Ou te faasilasila atu ua faataatiaese nei Taulumaga o le Fono Aoao Faitulafono seia aulia le itula e 2:00 i le aoauli.

Na faataatiaese Taulumaga a le Fono Aoao Faitulafono i le itula e 1:01 i le afiafi.